

東  
華  
續  
錄

光緒一百九十二

臣朱壽朋敬編

臣潘鴻鼎恭校

二月甲辰朔以李希杰爲順天府尹○調豐伸泰爲浙江按察使以沈瑜慶爲山西按察使○乙巳欽奉 慈禧端佑康頤昭豫莊誠壽恭欽獻崇熙皇太后懿旨撥內帑銀三十萬兩撫恤東三省難民○硃光燾奏閩省當南洋之衝各國人民游歷經商絡繹不絕交涉之事日益繁多而洋人傳教內地更幾於無處蔑有漳泉等府出洋謀生者不下數十萬人僑寓既久輒入外籍籍民教民既多動易滋事臣前任後卽經通飭各屬凡遇一應詞訟一體持平審理數月以來訪查各屬地方民教尙稱安謐至日本僧侶向無准在中國傳教之約乃漳州泉州一帶內地比來竟有日僧收徒布教賃屋設堂藉口中日通商行船條約第二十五款一體均沾之語朦混牽引迭經 臣照會駐廈門日本領事按約駁阻並電准外務部核覆亦以該約第二十五款與傳教無涉不能強爲牽引照會日使駁論內外堅持冀可稍伸補救此臣到任後辦理教案之大略情形也又查閩省礦產經前督 臣許應駸設立礦務局將汀州建寧邵武三府屬地方與華商華裕及法商大東兩公司訂立合同限三年內在指定地方覓地開採嗣由大東公司

派來礦師法人顧爾登勘定邵武金礦請照開採前督臣李興銳遵照部章飭繳照費該公司抗不遵辦實屬自取耽延乃竟請彼駐使向外務部索償鉅款經臣照會駐福州法領事據理剖說旋准領事照覆已能稍就範圍正在派員與商適該領事請假回國以致尚未成議又前督臣許應騷任內設立官腦局用日本人愛久澤直哉爲製腦技師由該技師保借日商三五公司洋銀二十萬元作爲官局存本乃開辦以後該技師不遵合同糜費鉅款又復擅派日人往內地各處緝私致將英商領單採辦之腦肆行攔截多起英使屢向外務部索賠商酌前督臣李興銳飭將英商扣腦發還內地日人撤退該技師均不遵辦始終任意妄爲李興銳卽飭辭退技師停辦官局該技師悍然不顧仍前把持更肆勒索盤經外務部與日使辨論迄無端倪臣蒞任後細核檔卷訪察情形因卽電知外務部轉商日使彼此另議辦法總以無礙中國主權不背各國條約爲宗旨現准外務部電覆業已認允派駐廈日本領事上野專一前來會議刻該領事尙未到省揣度情形將來當可和平了結下外務部知之○戊申祭社稷壇上親詣行禮○己酉袁世凱奏上年夏間准商部咨開本部具奏津準銀根較緊請多鑄銅元一摺奉旨依議欽此欽遵經臣於五月二十日奏復推廣鼓鑄情形在案伏查商部原奏內稱多購銅斤加工鼓鑄既可流通市面所得贏餘以之推廣津準工藝局廠收養貧民尤於地方大有裨益等因臣默揣各國致

富之源胥由商務而非講求工藝無以爲商務之先驅況迭奉 諭旨殷殷以整頓工藝爲急 朝廷於  
厚生利用軫念至深但此事非可空言貴有實力各省帑項支絀籌措爲難惟銅元餘利一端尙堪拮注  
以公家固有之利權開小民無窮之生計於事至便於利至公臣自收回天津卽創設工藝總局選派員  
司提倡工業調查本省及各省物產兼及進出口貨情形歲撥銀一萬二千兩爲經費三年以來由該局  
經營建立者四事一曰工業學堂以培養工業人才爲宗旨額設學生一百二十名分爲四科曰應用化  
學科曰機器學科曰製造化學科曰意匠圖繪科分延英日各教員授課計開辦經費房舍器備儀器用  
銀四萬六千兩常年經費需銀二萬四千兩續購各項機器需銀三萬五千兩一曰考工廠以啟發工商  
智識爲宗旨蒐採本省外省外國各貨品依類陳列縱人觀覽分設會計庶務及考察圖繪各司主其事  
每月演說工商各要理試驗理化各用法以廣人見聞每年則訪求各處工業製品比賽優劣以爲鼓舞  
獎勵之計開辦經費樓房貨品各項用銀二萬八千兩常年經費需銀二萬四千兩派員調查及續購品  
物需銀一萬兩尙須添建房舍增置圖畫需銀三萬兩一曰教育品陳列館以發揚學識教育實驗爲宗  
旨羅列中外各種教科書精儀器標本模型圖表分科陳設標籤貼說以備各學校管理者考覽諮詢其  
應用教育品節令漸次仿製並派員分駐外洋查考最新品物隨時購運館中附設藏書室及講堂俾各

學堂教員學生休息其內來館講習計開辦經費用銀二萬兩常年經費需銀八千兩此後每年添購品物增廣房舍需銀五千兩一日實習工場以傳習手藝提倡各項公司爲宗旨備高等工業學生之試驗場兼參仿藝徒學堂章程爲各公司取才之地額設工徒二百名分染色織布木金縫紉及化學製造各科每一種藝成卽勸諭紳商集股設立公司現天津織染縫紉公司業經集股開辦外屬各州縣領機試辦並送徒來津學習以後公司愈多商力日厚當有成效可觀計開辦經費用銀一萬五千兩常年經費需銀三萬六千兩此後續增廠舍添置機器需銀三萬兩以上各事均附屬於工藝總局統由候補道周學熙分設籌辦日起有功共計開辦經費用銀十萬九千兩常年經費需銀十一萬九千兩預備擴充經費需銀九萬五千兩皆經臣飭由銅元局餘利項下籌撥伏思 國家根本大計端在民生邇歲以來工商之利見擡外人吾民失業耗財者何可勝計外國收我生貨製成熟貨轉售而來尙獲厚利況中土民數衆多工價低賤若竭力提倡推行各屬必能興實業而塞漏卮此次北洋興辦工藝各事不過歲費十萬餘金且出自銅元餘利並未動支正款而化游惰爲精良勵紳民使聯合此後逐漸擴充添助資本不獨惠及貧民實亦隱裨國計庶上以慰 聖主恤民之至意下以盡微臣守土之職司得 旨著卽認真辦理務收實效○庚戌諭軍機大臣等有人奏營帶徐防馬隊參將熊長春缺額總餉各款著周馥按照

所參各節確查據實具奏毋稍徇隱原片著鈔給閱看將此諭令知之○壬子岑春煊奏柳州叛匪分作兩股陸亞發一股竄踞四十八峒於上年十月間殄滅其褚大歐四一股自竄慶遠府屬之思恩經署右江道龍濟光督飭各營剿辦淨盡經臣先後將剿辦情形摘要電奏茲再詳晰陳之褚大歐四等股匪於上年九月初在羅城縣柳城交界之五村一帶為濟字各軍痛加殲擊遂往竄慶遠府思恩縣屬之五十二峒糾結土匪勢復猖獗五十二峒與黔省接壤萬山盤折其險峻與四十八峒相等而下趨思恩慶遠各城勢尤便利維時張得貴所帶貴字兩營尙駐羅城慶遠濟軍亦半在羅城防堵陸榮廷所統榮字五營尙未到慶思恩駐勇無多勢頗危急龍濟光先調羅城濟軍跟蹤往援並飭慶遠濟軍馳往協助十月初匪由五十二峒分路來攻思恩縣城先到之濟軍亦分路迎敵連日截抄我軍頗有傷亡濟軍後隊繼至併力猛進匪始敗退陣斬二百餘級獲馬二百餘匹而還匪敗後仍踞思恩之廣南官橋等處兇賊尙熾廣南在縣西三十里山勢陡峻巖嶂極多攻剿極難著手適張得貴兩營到縣陸榮廷亦率五營由南甯行抵河池思恩之西路龍濟光親率濟軍馳往督剿匪股數千復連日來撲縣城十月二十一日濟貴各營分三路迎戰自辰至午匪不少退貴軍前營管帶辜嘉福奮勇衝殺歿於陣中弁勇多受鎗傷各營憤極猛攻匪始敗退次日匪由水源上竄龍濟光飛飭陸榮廷堵截匪竄河池屬之六甲岫焉陸榮廷率

榮軍渡江截剿並以開花礮連擊匪乃潰入山嶺龍濟光探聞土人知江峒一路可繞出泗色恐匪由此分竄星夜率隊赴江峒兜剿二十四日早匪之頭隊果到江峒見有官兵大爲驚駭龍濟光卽率隊截擊礮斃百餘人匪回官橋廣南又經張得貴率所部黃宇兩營並濟字三營竭力攔截礮斃又復不少匪遂退入水洞號洞各該洞四面危壁簷密林深匪爲官軍圍逼將踞此險要拚一死戰以求出路二十五日張得貴先飭營勇登山奪佔齊南三坳次日匪由齊南小坳蜂擁撲出貴軍前鋒挫失傷亡極多連失三坳張得貴親督後隊衝鋒血戰以示必死軍威復振立將三坳奪回斃匪千餘人奪鎗三百餘枝濟字各軍亦同時分兩翼抄截而入協力鏖戰首逆褚大爲我軍擊斃割取首級解赴柳州示衆生擒叛弁王華堂等軍前懲辦山谷嶺隘之間匪屍如阜而屯聚於嚴洞各處者勢尙固結龍濟光連夜馳至分派濟字各軍分扼隘口另選精銳直搗匪巢相持一晝夜乃將水洞攻破匪奔各隘悉爲伏兵擊回內外環鎗指攻斃匪七百餘破洞以後連日窮搜又斃匪二百餘人截獲逃匪三百餘人逆首歐四右脚受傷黑夜削卽至上北甲經團總拿獲解營報由派員前往思恩訊明凌遲處死於是柳州叛匪大股悉平其潛匿五十二峒者零星散伏已極窮蹙廣濟軍前往搜剿叛弁何十二死踞那峒與官軍相持兩日龍濟光設計誘擒並獲餘黨數十人一併懲辦收鎗九十五枝於是柳州叛弁亦全數伏誅洵足以快人心而伸法紀

其南丹分軍黔邊之匪爲曾五蘇八彭大黨衆不滿千人本與稽大猷四等響應而各自爲幫先在河南滋擾經陸榮廷追擊突過黔界黔軍及陸榮廷會合截回痛剿連日殲斃逃潰所餘無幾十二月間黔邊已無匪跡曾五先於十二月在三市地方爲榮軍格斃蘇八彭大隻身逃竄十二月二十六日又爲榮軍在拉朝三經地方擊斃刑取首級解交黔軍示衆迭據龍濟光陸榮廷稟報粵邊亦已盪平臣伏查西匪慣技散而不聚官軍不能圍攻而匪轉得處處牽綴兵力稽大猷四等自羅城五村兩次敗後將趨五十二峒是時頗有以思恩空虛爲慮者臣先飭龍濟光堵截竄路正欲逼入思恩使之歸於一隅始可設法結束又飛飭陸榮廷迅自南甯兼程前進扼守西路張得貴由東北追逼龍濟光由南路兜入四面合圍無可衝突廣南官橋之役鏖戰至四晝夜之久斃匪三四千人起出被擄男女先後共計六千餘人剿匪以來未有如此次痛快者臣復派員往查戰狀所稟均屬相符自此次大捷之後各屬零星散匪亦多反正投誠匪勢頓息實於全局大有裨益所有在事出力人員擬先擇尤請獎以勵戎行而作士氣二品頂戴著右江道廣西候補道龍濟光擬請以道員交軍機處記名遇缺請 旨簡放並請 賞給勇號督帶貴字兩營已革副將張得貴擬請開復原官翎枝並免繳捐復銀兩記名簡放分統榮字營藍翎補用守備陸榮廷擬請免補守備以都司儘先補用並加副將銜前敵營務處委員廣東候補直隸州知州姚紹



署擬請免補本班以知府仍留原省前先補用並 賞戴花翎廣東藍翎直隸州用候補知縣胡道源擬  
請免補本班以直隸知州仍留原省前先補用並加知府銜同知銜四川候補知縣龍觀光擬請免補本  
班以直隸州知州仍留原省前先補用並 賞戴花翎同知銜署恩恩縣事請補博白縣知縣譚華擬  
請在任以直隸州知州儘先補用並加知府銜管帶濟字前營游擊銜補用都司龔得勝擬請免補都司  
以游擊儘先補用管帶濟字選鋒營都司銜補用守備白有祿擬請免補守備以都司儘先補用並均請  
加副將銜管帶濟字後營州同職銜錢琛擬請以州同分省前先補用並加同知銜管帶濟字副前營都  
司儘先守備白志誠擬請免補守備以都司儘先補用並加副將銜幫帶濟字中營歲貢生廖訓法擬請  
以直隸州判分省補用並加知州銜濟軍委員廣東候補縣丞黎朝棟擬請免補本班以知縣仍留原  
省補用以上文武十三員確係在事異常出力合無仰懇 天恩俯准照獎以勵前勞而策後效得 旨  
如所請行○岑春煊奏廣西匪患始於左江而蔓延於柳慶各屬臣於光緒二十九年督師西征奏請以  
總兵丁槐署理廣西提督並將蘇元春原部各營分別裁併撥出銜字貴字十一營交丁槐統領專辦左  
江漢土銷雜山陰瘴深游匪踞為老巢地方備極凋敝丁槐受事以後先以整頓營伍築建礮卡為急務  
布置數月剿撫兼施民匪漸分游土亦漸斂跡三十年三月初間黃五肥股眾三千餘盤踞永康州羅陽

土司一帶丁槐曾合思恩南甯各營八路齊進痛加殲擊黃五肥遂被格斃餘黨之幸存者狂竄上思匿於廣東交界之十萬尖山丁槐率隊跟追復與東軍會合圍困匪糧不繼餓死無算其衝出者悉爲我軍殲斃附近通匪各村反正安業者數以萬計由是兵威所懾民團亦知振作捕匪禦盜以助官兵所不及左江漸就肅清適五月十一日柳州營勇肇變人心震動叛匪北走兵力亦全注於柳城懷而柳慶以南及思恩各屬土匪復熾先是署思恩府知府和廷彪所部綏遠軍八營曾分撥四營交丁槐接統及是以丁槐兵力較厚因咨商抽調數營進駐思恩切實搜剿思恩柳慶交界之積匪以滕正宜覃火生陳社求爲首要黨衆且悍蹤跡又極飄忽丁槐於八月間馳抵賓州兼旬之內擒獲賓貴諸匪王春林侯四陸八懲辦並起出被擄男婦多人匪黨震懾各營分投剿捕迭有斬擒尤以剿辦滕正宜楊飛龍兩戰爲最著楊飛龍匿於來賓之松柏村營官陳世華唐啟新攻剿三晝夜不克卒以火攻始將楊飛龍及匪黨六七百人焚斃滕正宜匿於遷江之洛敏嶺地極險峻唐啟新首先奮攻登臨猛擊匪越巖層潰逃我軍邀截竟將滕正宜擊斃斬馘四十二級賓川遷江來賓一帶漸次靜謐遂進辦慶遠之忻城理苗忻城理苗均係土司與遷江來賓接壤年來爲覃火生陳社求等往來竄擾居民大半被匪脅從時署右江道龍濟光專辦五十二峒未暇分兵兼顧覃陳等匪勢益猖獗丁槐於十月間分四路進兵節節前進各軍遇

匪卽擊十餘日連破嵒米嵒照一帶匪巢二十餘處奪獲快鎗土鎗八百餘枝生擒匪首覃火生及其弟  
覃三覃四覃肖孫等訊明正法黃五肥一匪亦先在尖山地方爲康啟新擊斃陳社求竄匿來賓十二月  
復爲陳世華圍攻生擒訊辦匪勢日衰兵氣日振往來掃蕩餘孽悉除於二十九年懸賞購緝之巨匪  
至是已殄滅無遺十一月下旬丁槐因聞有股匪由柳城竄理苗因飭各軍前赴馬平迎戰過於馬平  
之竹木古等處分路接仗我軍頗有傷亡入夜扼要設伏天甫黎明匪齊衝出爲伏軍四面合截鎗斃無  
算擒獲三十八人奪獲快鎗二百餘枝查有達字營叛弁王崑山莫昌年黃才忠黃道生在內訊係在融  
縣苗山擊敗逸出糾合土匪圖竄理苗卽於軍前正法於是達營叛勇全股遂以悉平臣查左江一帶游  
土勾結匪患已深思恩及柳慶以南積匪本多竄匿尤易丁槐以五千餘人辦理左江未及期年漸就平  
靖移辦思慶積年巨寇悉已成擒所部士卒實能所向有功其剿辦右江出力人員俟查明另行覈案核  
保現辦思恩忻城理苗各營奉馳四月轉戰於巖穴險隘之地實屬備著勤勞若不先行請獎無以鼓舞  
戎行所有在事異常出力之管帶銜字前營花翎副將銜廣西提標補用游擊綽勇巴圖魯陳世華擬請  
免補游擊以參將儘先補用都司唐啟新擬請免補都司以游擊儘先補用並加副將銜管帶黃字後營  
藍翎都司儘先守備傅壽福幫帶綏連先鋒左營藍翎儘先守備徐占得均擬請免補守備以都司儘先

補用並加游擊銜字營親兵營右哨弁武舉木全忠擬請以守備儘先補用並 賞戴花翎革職留任  
効力管帶銜字後營花翎儘先補用游擊黎千才擬請開復原官翎枝並免繳捐復銀兩前敵隨營文案  
委員花翎指分貴州試用同知張德亮擬請免補同知以知府仍留原省補用管帶綬遠副中營指分四  
川試用通判夏文炳擬請免補通判以同知直隸州仍留原省補用隨營委員分省試用府經歷趙紹曾  
擬請免補本班以知縣分省歸候補班前先補用雙月選用縣丞鮑府寬擬請免選縣丞以知縣儘先選  
用廣西試用縣丞陳東秀擬請免補縣丞以知縣仍留原省補用管帶綬遠先鋒右營通判職銜張錦芳  
擬請以通判儘先選用增生劉祖恩擬請以縣丞分省前先補用文童李兆福擬請以州吏目分省補用  
以上文武十四員經 覆加查核均係在事異常出力毫無冒濫合無仰懇 天恩俯准如請給獎以彰  
勞勩而勵戎行其出力之把總馬文富等弁及勇目另行咨部給獎至左右江各屬地方凋敝現已通飭  
各州縣招集流亡發給牛種以安農業一面添派委員分往忻城理苗一帶妥為查撫合併陳明得 旨  
如所請行○癸丑孫家鼐因病續請開缺不允予假兩月調理○丙辰祭 關帝廟 上親詣行禮○戶  
部奏據練兵處咨稱上年十二月間具奏增練兵隊摺內聲明除武衛右軍自強軍併編一鎮不敷款項  
由北洋另籌外合計新添一鎮改編山東一鎮應需餉項請戶部按月撥發銀二十五萬兩總計各省認

解部庫練兵經費核與前設二三兩鎮此次新添一鎮改編山東一鎮每月應撥餉項數目有盈無絀倘解款現有不敷仍由戶部照案墊發將來如數扣抵等因前來臣等查練兵經費自欽派稅煙酒別中飽并戶部遵旨統籌除弊節流十條通行各省籌解以來嗣據各該督撫先後奏報認籌常年各數通計約六百萬兩惟銅幣盈餘一項多至二百七十萬兩此項盈餘有俟局廠修竣開工以後方能照提者有恐銅價增長錢價低落不能照提者誠恐緩不濟急查上年十二月間臣部具奏練兵處以北洋第二三兩鎮來年約需銀三百餘萬兩自正月起由部按月開放銀二十五萬兩自應照數墊發等因奏准在案北洋二三兩鎮本年月餉二十五萬兩由部庫按月墊發若再將新添及改編各鎮月餉統由部庫墊發計年共需銀六百萬兩查近年部庫存款本屬無多倘各省練兵經費不能如數如期解到庫儲必致告罄而按月應放京內外各項兵餉口分津貼等項均為計款所需萬一周轉不敷關係實非淺鮮臣等再四籌商練兵實為根本至計餉款尤為練兵要需固知各省大吏必能共體時艱統籌兼顧惟臣部既有墊撥之責即不能不多所顧慮蓋必各省於派解之數及認籌之數一一無欠無延而部庫之籌墊乃為的款而新軍之餉需乃無貽誤現雖嚴核已解未解之數以杜宕延援定議獎議處之章以昭懲勸然究皆有款可用辦法若現在並無一欸到部庫訂籌墊事關計款急不可待自應由臣部奏請諭旨分行

各省務令於二月內將上年欠解之款及本年正二兩月已籌已認之款先期騰挪電匯來京以後查照本年應認全數按數均攤限於每月上旬解到無論如何設法務令依期籌解不得稍有拖欠以便部中按月開放免致兼顧為難若各省不能提前解部及以後不能如期接濟設有貽誤不但部將來不敢當此重咎即目前亦難任此墊撥 聖明在上早能洞悉惟有仰懇 俯鑒部庫為難情形請 旨飭下各省將軍督撫提前籌解勿稍違誤并准 臣部查照京餉甘餉成案分別勸懲另行奏明辦理以重兵精而持久遠 上諭軍機大臣等戶部奏請飭各省籌解練兵經費不得稍有拖欠等語練兵為根本至計餉項尤練兵要需乃各省認籌練兵經費未能如數如期解到以致部庫籌墊兼顧為難著各省將軍督撫按照認解數目每月先期籌解毋得宕延並著戶部查照京餉甘餉成案分別勸懲隨時奏明辦理原片著鈔給閱看將此通諭知之○戊午以徐印川署貴州提督○己未廣西按察使劉心源緣事解任○以余誠格為廣西按察使○辛酉調漢子潼為廣東按察使以程儀洛為安徽按察使○壬戌袁世凱奏光緒三十年練兵處兵部釐定陸軍學生新餉軍器各制一則曰急須考求各國衛生之術並備馬醫之選再則曰經理供給中國尚無此項專門人員宜參仿各國軍器愈出愈新我應擇其最新最利者以資戰備等因業蒙 俞允頒行各省在案亟應欽遵辦理 臣維軍政之不振多由軍學之不精軍學之不精

實由科學之不講東西各國崇尚教育醫術器械皆設專科以專科之學問定軍佐之職司是以士飽馬騰雖裏創昇傷而愈奮乘勝連闕無繼絕彈盡之可愛萃衆人之絕技異能助國家以戰勝攻取兵力之盛非偶然也方今 朝廷講求武備通飭各省興學儲才不遺餘力惟學堂雖逐漸籌設大抵普通課程尙少專門學業若非分途造就仍恐難語精深臣爰遵照新章參酌西法謹於武備各學堂外區設專門各學堂曰軍醫學堂計挑取滿漢學生共一百四十名分班畢業分年授課以儲正副軍醫官軍醫長之選曰馬醫學堂計挑取速成正課學生共一百名分班授學分期畢業以儲正副馬醫官馬醫長之選曰經理學堂計挑取速成學生共四十名按時畢業按月定課以儲正副軍需官軍需長之選曰軍械學堂計挑取速成學員共四十名逐械研求逐件講解以儲正副軍械官軍械長之選如此因材施教爲學擇人遲之數年明醫藥剖解之術勝蒐討軍實之任者當不乏人庶幾軍心有恃而愈固軍氣有備而愈揚未事既調諒籌畫之周詳臨敵自奔走驅驅之恐後此中外不易之理軍人制勝之基創始雖難收效甚溥臣所以不敢避難就易而竭力經營也下練兵處戶部兵部知之○癸亥諭軍機大臣等鄭孝胥電奏病勢轉劇仍請速舉替人俾免廢弛等語著岑春煊李經羲會商妥議奏明請旨○甲子雨○乙丑以鐵良署兵部尙書○丙寅 景陵隆恩殿災○諭載澤等奏 景陵隆恩殿被災一摺 寢殿重地宜如何

小心守護該大臣疏於防範實屬咎有應得載澤壽全輩陞阿均著交該衙門嚴加議處其因何失火情  
形著派趙爾巽鐵良敬謹查勘並將派值官弁兵役人等提同嚴訊從重懲辦○戶部奏近來各關徵收  
華洋稅鈔並不按結奏報往往出入款目數盈鉅萬而挪移借墊不奏不咨其有擅行動用之款必待奏  
報到部始能按款駁正行令提回列收則已事過人非以致弊端紛紜永無清盤之日請 飭各督撫將  
軍轉飭各關道嗣後洋稅收支數目務當按結奏報毋得遲延其從前未經奏報各案自奉 旨之日起  
限三箇月內一律分結分款併案奏報得 旨如所議行○丁卯練兵處兵部等奏上年十二月二十三  
日軍機處片交出使大臣梁誠奏請設陸軍大學堂省學堂一摺又王公子弟選入陸軍學堂肄習一片  
均奉 旨練兵處兵部議奏欽此據原奏內稱請於近畿地方設陸軍大學堂一區於各省要隘地方各  
設陸軍省學堂一所省學四年畢業以千把用拔尤升入大學二年畢業授以都守等官舉辦四年選大  
學者各省共四百人按年續選六年大學畢業得四百人按年遞增等語查上年八月間臣等奏定陸軍  
學堂辦法係參仿東西學制自小學中學兵官學大學馬礮隊專門各學堂層累遞進其間並須入軍隊  
學習故大學畢業必以十年為期該大臣原奏係分省學大學兩層亦無軍隊學習期限大學畢業祇需  
六年為時太促恐難深造且學生額數應按全國軍隊需兵官若干分年核算臣等奏定學額計七年後



中學畢業兼習初級兵官職務者約得一千五百人該大臣原奏謂六年大學畢業得四百人多寡懸殊尤屬不敷分布以上各節均有奏定新章可循應請毋庸議又原片內稱宜選王公宗室子弟入學堂一體肄習畢業後分派各國講求武備等語竊維尚武之風今世所重教育之典古訓惟昭我朝定制王公子弟冠頂之初卽習騎射寓教思於嚴養強根本於維城懿鑠宏規卓越今古現在更新軍制講求肄習允宜始自貴近以爲風氣之先該大臣所請用意至爲深遠查日本學制凡王公子弟入陸軍學校肄業另建室舍以居用昭寵異擬卽參仿其意略爲更改設立貴山學堂一所專爲王公大臣子弟肄武之區以示優隆而存體制特規模創始條目綦繁其開辦章程尙須詳細籌議應俟擬定後再行專摺具奏恭候 聖裁得 旨如所議行○戊辰又兩○己巳以李昭煒署禮部右侍郎○庚午 上御乾清宮美國使臣康格覲見○辛未諭軍機大臣等有人奏調補山東布政使山西布政使吳廷斌貪鄙昏庸徇私溺職一摺著張曾敭按照所參各節確查具奏毋稍徇隱原摺著鈔給閱看將此諭令知之

三月甲戌朔 上詣 奉先殿 壽皇殿行禮○慈福端佑康頤昭豫莊誠壽恭欽獻崇熙皇太后 皇上御乾清宮德國親王利物浦覲見 皇太后旋以頭等第二雙龍寶星賜之○免漢蔭生考試如滿員例○錫良電奏贍對改土歸流秦寧寺喇嘛藉端煽亂鎗斃弁兵得 旨 駐藏大臣鳳全就近剿辦○

四川擬爲匪徒滋事剿平之○四川巴塘番人以駐藏幫辦大臣鳳全力持喉對改土歸流事戕之○乙亥上祭先農壇行耕藉禮○俄兵入吉林長春據之○准泰寶鎮總兵兼總管內務府大臣慶福開缺○丙子以瞻對土司不服改土歸流飭四川提督馬維騏率兵剿之○財政處戶部奏上年十一月初十日承准軍機大臣字寄奉 上諭鐵良奏湖北湖南於宜昌設立總局抽收土膏稅捐繼又並江西安徽兩省合辦較各省分辦之時溢收甚鉅兩廣蘇閩亦係雲貴川土行銷之地若合八省爲一收數必更可觀等語著財政處戶部卽行切實舉辦其統捐收數除按各省定額撥給外溢收之數另儲候解專作練兵經費的款不得挪移並著財政處戶部會商各該省督撫從速詳定章程奏明辦理原摺著鈔給閱看等因欽此當經通行各該督撫遵照並令迅速咨擬迄今數月覆到者尙屬寥寥查川漢等處土藥商運均在七八月間故稅捐以秋季爲最旺若非速定章程及時開辦則本年收項大宗既去尾數無多且等詳加酌覈鄂湘贛皖統捐已著成效該侍郎所陳八省合併辦法自爲切實可行應如所請將湖北宜昌原設之局改爲八省總局並於湖南之洪江廣西之梧州各設分局由總局派員經理原奏所指合辦統捐省分爲兩湖兩廣江蘇江西安徽福建八省凡雲貴川土行銷該八省者經由總局分局均卽照收土稅無論輪船民船載運一律預徵膏捐其徵收章程悉照宜昌現行辦法既納統捐後運往各處如非

落地銷售概不重徵土稅膏捐兩項印花及四聯票據需用其鉅均由總局頒發該局應用商運所至倘無印花或與票據不符即係私土私膏查獲後照章罰辦所有經徵款目及支銷等項由總局按季冊報戶部查覈此項收款均照二十九年收數作為各省定額由局合收分解溢收之數遵照 諭旨另儲候解專作練兵經費惟統捐創始於湖北該省攤認賠款及兵工廠經費多由此取給嗣後歸總局撥明年應需數目仍在原收項下照撥再有溢徵之款即行提存廣西現辦軍務待餉孔亟兼賴廣東就近協濟除照定額撥給外該兩省溢收之款並由戶部隨時察核分別酌撥若干成俾應急需他省不得援以為例此次統捐辦法一稅之外聽其所之既便商民復溢公帑俟辦有端緒再將陝豫等處土藥分別釐定次第推行至宜昌一局總辦八省稅捐責任綦重現充該局總辦補用道孫廷林雖稱熟悉情形究恐難資統攝應請 特派大員管理限於四月內開辦以重帑項而一事權其餘未盡事宜仍令詳細籌度並將二十九年以後鄂湘等省土稅膏捐收支各數查明分別奏准辦理奏入軍機大臣奉 旨著派柯逢時管理八省土膏統捐事宜○丁丑 慈福端佑康頤昭豫莊誠壽恭欽獻崇熙皇太后 皇上御乾清宮德國使臣穆默同福親王覲見○調升允為陝甘總督崧蕃為閩浙總督○己卯調武衛右軍二千入駐南苑○辛巳 上奉 慈福端佑康頤昭豫莊誠壽恭欽獻崇熙皇太后幸頤和園駐蹕○諭前因

籌辦捐款迭經諭令不准巧立名目苛細病民近聞各省辦理學堂工廠諸端仍多苛擾甚至捐及方外殊屬不成事體著各該督撫飭令地方官凡有大小寺院及一切僧家產業一律由官保護不准刁紳蠹役藉端滋擾至地方要政不得勒捐廟產以端政體○諭御史阿查本奏恤山東商人李遇龍擬立公司建造京張鐵路願將餘利報効等語鐵路要政關係綦重該御史輒爲商人具奏代請係屬濫竽充數謬膽大阿查本著交部議處原摺著擱還○諭前據載澤等奏 景陵 隆恩殿被災當經諭令趙爾巽鐵良前往敬謹查勘茲據查明覆奏火起自上別無可疑形跡惟 隆恩殿係敬謹供奉 神牌重地無故被焚覽奏竇深悚惕該各員等職司守護殊非尋常疎忽可比章京奎連承緒均著卽行革職從重發往軍臺効力贖罪總管若麟翼長春林慶皆均著卽行革職內務府員外郎烏爾賽圖副管領博爾賀圖委副管領濟爾福堪均著交該衙門嚴加議處郎中連盛主事博爾莊武奮不顧身將 神牌全行請出著加恩免其議處員外郎慶齡內管領景星救護出力均著從輕交該衙門照例議處拜唐阿增福富倫領催志誠郡山均著片革餘依議嗣後該大臣等務當督飭各員益加謹密防患未然以昭慎重所有應修各工著派鹿傳霖趙爾巽敬謹估修○壬午飭張勳以所部准軍移駐張家口○癸未錫良奏鐵路興築固難辭費尤難然若集借外款應者爭至則亦未爲甚難也惟川漢路工上年奴才在京與兩湖督臣

張之洞再四熟商均主自辦曾經奴才屢疏陳請川省士紳達邇同詞亦皆力請自辦但計里四千有奇計費五千萬以上中國招集民股最爲難事川省地居僻遠耳目拘隘昔爲鄰省辦礦等股寸效未睹至今人多畏之驟欲集數百萬股之多此誠難之尤難者也奴才督飭司道及該公司並與在京在籍諸紳往復熟商惟有開示誠心祛疑惑之端而破庸俗之論一則將修路關繫全川之故利害得失詳明曉諭一則民間恆慮出資後事或輟於半途欸或移於他用茲將公司內官欸民欸悉作股本無論異日有何項急需決不提挪一則自辦者卽不招外股不借外債之謂也而士民猶恐持之不堅將來中外紛歧利權侵損茲當首嚴其戒期於始終一致如非中國人之股公司概不承認經此定議以後稍明時務之人汲汲焉不俟終日卽竊敢冀聞者亦不似從前以建軌爲駭怪該紳等咸請公司酌擬集股章程選舉端人分途廣募並請仿照歷屆辦理糧穀等項按利出穀百分取三意在輕而易舉積微成鉅該公司又請在重慶府城試鑄銅元撥其餘利充作公司股本綜此數項雖尙無實在確數然按年皆爲有著此外如有可籌之欸不涉苛細煩擾尙擬陸續興辦籌費既有成議審路考工又不容緩水陸之險皆在川鄂接壤之區應從宜昌開工先能修至萬縣卽可避峽江裂瀾之患商貨頓易流通軌料均便輸運電商兩湖督臣張之洞意見亦復相同將來勘路興工購料諸事當再會商張之洞悉心籌畫通力合作一俟商定

另行專摺奏陳下所司知之○甲申諭昨據趙爾巽鐵良面奏 景陵 隆恩殿工程業已勘估大概並請將 各陵守護章程酌量變通及歲修工程亦須擇要早辦以昭鄭重等語此次 隆恩殿工程即著黃成垣爾巽鐵良詳擬承修所有變通 東西陵守護章程及歲修工程併著趙爾巽鐵良妥議具奏庶傳錄即著毋庸估修崇壽李紱藻並著毋庸查勘○乙酉以毓朗為內閣學士○賞連魁副都統銜作為科布多參贊大臣○丁亥諭丁振鐸嚴飭邊防各營竭力兜剿廣西土匪毋任竄越○己丑俄使出薩爾卒於京師命載振前往 賜唁葬葬於彰儀門外 賜花園○諭周馥奏特參武職各員等語統領續備副四旗記名總兵蕭有元因恤兵艱馭眾無術著以都司降補管帶新湘右旗儘先游擊彭庚午兵不足額營務腐敗合字後營哨官儘先守備楊得勝約束不嚴軍紀廢弛揚州營中軍守備孫紹貴貪利營私被控有案著即行革職○庚寅以潘萬才署江北提督○召恩壽回京○政務處奏本年二月初九日准軍機處鈔交翰林院侍讀學士惲毓鼎等奏蘇淮分省略舉弊端以備採擇一摺奉 旨著併陸潤庠前摺交政務處按照奏定章程會同再由政務處具奏欽此○等當遵照章程咨行各衙門會議旋據咨送說帖前來○等詳加檢覈說帖內主蘇淮不必分省另設大員者計四十二件主專裁淮撫者計三十二件主蘇淮仍議分省暨復設漕督者共七件正在敷議間復准軍機處鈔交署兩江總督周馥奏蘇淮分

立行省詳陳利弊一摺奉 硃批政務處歸併會議案內議奏欽此查臣等前於議復兩江總督端方奏擬修撰張謇條陳呈請設徐州行省暨御史周樹謨請裁漕督摺內擬裁漕督改設江淮巡撫原因淮徐一帶民情强悍伏莽滋繁當南北之衝地方關繫重要既裁漕督必須改設大員鎮撫其間方昭妥現據各衙門說帖內請改設巡撫諸多不便擬改設提督駐紮者居多後經查覈周觀所奏亦以分設行省不如改設提督駐紮為合宜該督督身任兩江吏屬確有所見擬請卽照該督督所請改淮揚鎮總兵為江淮提督文武並用節制徐州鎮及江北防練各營仍以淮揚海道兼按察使銜凡江北梟盜重案應卽時正法軍流以下人犯歸其審勘毋庸解蘇以免遲滯似此則江北文武均有綱領江淮巡撫一缺自可無庸設立舊有漕標官兵卽作為提標以重兵力而資鎮懾惟准徐各屬向為盜賊出沒之區現既裁撤巡撫改設提督應卽令該署督將營伍重新整頓認真訓練以重地方其餘未盡事宜應由兩江總督江蘇巡撫悉心酌議分別奏咨辦理 上諭政務處奏擬會議蘇准分立行省一摺蘇准分省於治理既多不便著卽無庸分設江淮巡撫卽行裁撤所有淮揚鎮總兵著改為江北提督以資鎮懾○辛卯法國主教樊國樑卒於京師賞銀五百兩治葬○壬辰副程儀洛為山西按察使飭漢子潼仍留安徽按察使任調沈瑜慶為廣東按察使○諭長庚徐世昌奏考驗北洋陸軍情形各摺片據稱考驗三鎮訓練之法

編制之宜體大思精非他省可及等語北洋陸軍袁世凱凱旋經營規模宏備具見公忠體國任事實心深堪嘉尚其賢能卓著之選要鎮統制官儘先選用道王英楷步隊統領官儘先選用知府張懷芝礮隊統領官儘先補用參將田中玉馬廠一鎮步隊統領官補用副將馬龍標保定一鎮步隊統領官補用游擊張永成均著傳旨嘉獎督辦陸軍學堂之分省補用道馮國璋於各堂學務具有成效並著傳旨嘉獎並新練旗兵甫及一年卽已改觀足見奮勉向上纖良悉心教練辦事認真不負委任仍著獎勵等督飭各營切實講求蔚成勁旅用副朝廷整軍經武之至意○癸巳伍廷芳奏光緒二十八年四月初六日奉上諭現在通商事益繁多著派沈家本伍廷芳將一切現行律例按照交涉情形參酌各國法律悉心考訂妥爲擬議務期中外通行有裨治理等因欽此仰見 聖謨宏遠欽佩莫名當經臣等酌擬大概辦法並遴選諳習中西律例司員分任纂輯延聘東西各國精通法例之博士律師以備顧問復調取留學外國卒業生從事編譯請撥專款以資辦公刊刻闢防以昭信守各等因先後奏明在案計自光緒三十年四月初一日開館以來各國法律之譯成者德意志曰刑法曰裁判法俄羅斯曰刑法日本曰現行刑法曰改正刑法曰陸軍刑法曰海軍刑法曰刑事訴訟法曰監獄法曰裁判所構成法曰刑法義解校正者曰法蘭西刑法至英美各國刑法 臣廷芳從前游學英國夙所研究該二國刑法雖無專書然散見他



籍者不少飭員依類輯譯不日亦可告成復令該員等比較異同分門列表展卷瞭然各國之法律已可得其大略臣等以中國法律與各國參互考證各國法律之精意固不能出中律之範圍第刑制不盡相同罪名之等差亦異綜而論之中重而西輕者爲多蓋西國從前刑法較中國尤爲慘酷近百數十年來經律學家幾經討論逐漸改而從輕政治日臻美善故中國之重法西人每皆爲不仁其旅居中國者皆藉口於此不受中國之約束夫西國首重法極隨一國之疆域爲界限甲國之人僑寓乙國卽受乙國之裁判乃獨於中國不受裁判轉予我以不仁之名此亟當幡然變計者也方今改訂商約英美日葡四國均允中國修訂法律首先收回治外法權實變法自強之樞紐臣等奉 命考訂法律恭繹 諭旨原以嚴守藩章授外人以口實不如酌加甄探可默收長駕遠馭之效現在各國法律已得其大凡卽應分類編纂以期尅日成書而該館員等致謂宗旨不定則編纂無從措手臣等竊維治國之道以仁政爲先自來議刑法者亦莫不謂裁之以義而推之以仁然則刑法之當改重爲輕固今日仁政之要務而卽修訂之宗旨也現行律例款目極繁而最重之法亟應先議刪除者約有三事一曰凌遲梟首戮屍查凌遲之刑唐以前無此名目始見於遼史刑法志遼時刑多慘毒其重刑有車轆轤擲諸名而凌遲列於正刑之內宋自熙寧以後漸亦沿用元明至今相仍未改梟首在秦漢時惟用諸夷族之誅六朝梁陳齊周諸律

始於斬之外別立賜名至隋而刪除其法自唐迄元皆無此名今之斬梟仍明制也戮屍一事惟秦時成  
蠶軍反其軍吏皆斬戮屍見於始皇本紀此外無聞歷代刑志並無此法明律亦無戮屍之文至萬曆十  
六年始定此例亦專指謀殺祖父母父母者而言 國朝因之後更推及於強盜案件凡斬梟之犯監故  
者無不戮屍矣凡此酷重之刑固所以懲戒凶惡第刑至於斬身首分離已爲至慘若命在頃刻而必  
令備嘗氣久消亡刀鋸猶難倖免 諸仁人之心當必慘然不樂謂將以懲本犯而被刑者魂魄何知謂  
將以警戒衆人而習見習聞轉感其殘忍之性故宋真宗時御史劾請變創殺人賊帝曰五刑有常刑  
何爲慘毒也陸游請除凌遲之刑亦謂肌肉已盡而氣未絕肝心聯絡而視聽猶存感傷至和煦損  
仁政實非聖世所宜遵隋時頒律詔云梟首誠無所取不益懲肅之理徒表安忍之懷洵皆仁人之言也  
且刑律以唐爲得中而唐律並無凌遲梟首戮屍諸法 國初律令重刑惟有斬刑準以爲式尤非無微  
擬請將凌遲梟首戮屍三項一概刪除死罪至斬決而止凡律內凌遲斬梟各條俱改斬決斬決俱改絞  
決絞決俱改絞候入於秋審情實斬候俱改絞候與絞候人犯仍入於秋審分別寬緩將來應否酌量變  
通再由臣等妥議核定或謂此等重法所以處窮凶極惡之徒一旦裁除恐無以昭炯戒顧有唐三百年  
不用此法未聞當日之凶惡者猶多且貞觀四年斬死罪二十九開元二十五年方五十八其刑簡如此

乃自用此法以來凶惡仍接踵於世未見其少則其效可睹矣化民之道固在政教不在刑威也一曰緣坐緣坐之制起於秦之參夷及收司連坐法漢高后除三族令文帝除收孥相坐律當時以爲盛德惜夷族之誅猶間用之故魏晉以下仍有家屬從坐之法唐律惟反叛惡逆不道律有緣坐他無有也今律則姦黨交結近侍諸項俱緣坐矣反獄邪教諸項亦緣坐矣一案株連動數十人夫以一人之故而波及全家以無罪之人而科以重罪漢文帝以爲不正之法反害於民北魏崔挺嘗曰一人有罪延及閭門則司馬牛受桓魋之罰柳下惠膺盜跖之誅不亦哀哉其言皆篤論也罰弗及嗣虞書所美罪人以族周誓所譏今世各國咸主持刑罰止及一身之義與罪人不孥之古訓實相符合洵仁政之所當先也擬請將律例緣坐各條除知情者仍治罪外其不知情者悉予寬免餘條有科及家屬者准此一曰刺字刺字乃古墨刑漢之黥也文帝廢肉刑而黥亦廢魏晉六朝雖有逃奴刳盜刺字之文旋行旋廢隋唐皆無此法至石晉天福間始創刺配之制相沿至今其初不過竊盜逃人其後日加繁密刺事由刺地名刺改發有例文不著而相承刺字者有例文已改而刺字未改者其事極爲紛糅在立法之意原欲使莠民知恥庶幾悔過遷善詎知習於爲非者適予以標識助其凶橫而偶罹法網者則黥刺一膚終身鬱辱誠如宋志所謂面目一壞誰復顧情強民適長威力有過無由自新也夫肉刑久廢而此法獨存漢文所謂刻肌膚痛

而不德者正謂此也未能收彌教之益而徒留此不德之名豈仁政所宜出此擬請將刺字款目概行刪  
除凡竊盜皆令收所習藝授罪名輕重定以年限俾一技能嫻得以糊口自少再犯三犯之人一切遞解  
人犯嚴令地方官認真簽差押送果能實力奉行逃亡者自少也以上三事皆中法之重者參諸前人之  
論說既多議其殘苛而考諸今日環球各國又皆廢而不用且外人皆議中法之不仁者亦惟此數端爲  
最甚此而不思變通則欲彼之就我範圍不獨南轅而北轍乎查各國修訂法律大率於新法未布設單  
行法或淘汰舊法之太甚者或參考外國之可行者先布告國中以新耳目是以略採其意請將重法數  
端先行刪除以明示天下宗旨之所在此外或因或革端緒繁多俟臣等隨時整訂陸續奏聞惟更張之  
始度必有議其後者竊思法律之爲用宜隨時運爲轉移未可膠柱而鼓瑟昔宋咸平時刪太宗詔令十  
存一二史志稱之我朝雍正乾隆年間修改律例於康熙時現行條例刪汰不知凡幾卽臣等承 詔  
之初亦以 祖 宗成憲未敢輕議更張第環顧時局默驗將來實不敢依違模稜致令事機坐失近日  
日本明治維新亦以改律爲基礎新律未頒卽將磔罪爲首籍沒墨刑先後廢止卒至民風丕變國勢  
暇日盛今且爲亞東之強國矣中日兩國政教同文字同風俗習尚同借鑑而觀正可無庸疑慮也伏維  
我 皇太后 皇上深念時艱 勸求上理 特詔考訂法律期於通行中外法極漸可挽回用敢擇其

至要者披瀝上陳倘蒙 俞允並請 明降諭旨宣示中外俾天下曉然於 朝廷宗旨之所在而咸欽  
仁政之施行一洗從前武備嚴酷之習卽宇外之環伺而觀聽者亦莫不悅服而景從變法自強實基  
於此 上諭伍廷芳沈家本等奏考訂法律請先將律例內重刑變通酌改一摺我朝入關之初立刑以  
斬罪爲極重順治年間修訂律例沿用前明舊制始有凌遲等極刑雖以懲儆兇頑究非國家法外施仁  
之本意現在改定法律嗣後凡死罪至斬決而止凌遲及梟首戮屍三項著卽永遠刪除所有現行律例  
內凌遲斬梟各條均改爲斬決其斬決各條俱改爲絞決絞決各條俱改爲絞監候入於秋審情實斬監  
候各條俱改爲絞監候與絞候人犯仍入於秋審分別實緩辦理至緣坐各條除知情者仍治罪外餘著  
悉予寬免其刺字等項亦著概行革除此外當因當革應行變通之處均著該侍郎等悉心甄採從速纂  
訂請旨頒行務期酌法準情折衷至當用副朝廷明刑勸教之至意將此通諭知之○伍廷芳等奏據刑  
部咨稱光緒二十九年十二月間准政務處咨原任兩江總督劉坤一湖廣總督張之洞會奏變法第二  
摺恤刑獄一條現在修改刑律足資考證摘錄原奏咨行刑部查照相應轉咨修訂法律大臣酌核辦理  
等因前來 臣等查該督等原奏內稱獄爲生民之大命結民心禦強敵其端皆基於此我 朝大清律例  
較之漢唐唐明之律其仁恕寬平相去霄壤徒以州縣有司實心愛民者不多於是濫刑株累之酷罔聞

凌虐之弊往往而有外國人來華者親入州縣之監旁觀州縣之問案疾首感額譏爲賤視人類驅民入教職此之由等語係屬實在情形是欲固民心非恤刑獄不可恤刑獄共分九條除禁訟累一條重在裁革書吏案經欽奉諭旨通飭遵行教工藝改罰減二條前經刑部另行奏准通行各省恤相驗一條應由刑部奏明辦理省文法一條寬減處分再隸吏部應俟會同吏部酌核辦理外其省刑責重案證修監羈派專官四條等語就該督等所奏悉心核議查原奏省刑以條內振擗敲扑呼號血肉橫飛最爲傷和害理有悖民牧之義夫民雖犯法當存哀矜供情未定有罪與否尙不可知理宜詳慎況輕罪一愆日後仍望其勉爲良民吏宜存其廉恥擬請以後除盜案命案證據已確而不肯認供者准其刑嚇外凡初次訊供時及牽連人證斷不准輕加刑責其笞杖等罪酌量改爲羈禁或數日或數旬不得凌虐久繫等語臣等查笞杖仿於虞書鞭扑不過以示薄懲故律內杖罪至一百而止其刑本輕厥後變本加厲問案率用刑訊動輒盈千累百血肉橫飛誠如原奏所云最爲傷和害理居今日而欲救其弊若僅宣旨禁用刑訊而笞杖之名因循不去必至日久仍復弊生斷無實效然速如原奏改爲羈禁數日數旬立法過輕又不足以示懲警臣等公同酌議擬請嗣後除罪犯應死證據已確而不肯供認者准其刑訊外凡初次訊供時及徒流以下罪名概不准刑訊以免冤濫其笞杖等罪仿照外國罰金之法凡律例內笞五十以

下者改爲罰銀五錢以上二兩五錢以下杖六十者改爲罰五兩每一等加二兩五錢以次遞加至杖一百改爲罰十五兩而止如無力完納者折爲作工應罰一兩折作工四日以次遞加至十五兩折作工六十日而止旗人有犯照民人一律科斷至此項罰金折爲作工之犯嗣後卽應按照新章收所習藝惟查刑部前經奏准通行各省設立罪犯習藝所迄今時逾兩年除直隸河南山東雲南業經奏明辦理外其餘各省皆未據奏報實屬不成事體相應請 旨飭下各省督撫將軍都統迅將罪犯習藝所一律辦齊毋任再延致誤要政並請 飭下順天府五城一體設立習藝所收拘輕罪人犯以歸畫一其開辦詳細章程應由該衙門自行奏明辦理又查原奏重衆證條內據稱外國問案專憑證人衆證既確卽無須本犯之供然外國問案有專官刑律少死罪監獄不苦故有確證者卽不肯狡供且警察之法最密平日之夏勞蹤跡一一周知故證據多問案皆係列坐證人亦從不替押故證人易中國州縣事煩素無警察而刑罰較嚴出入其鉅旁人多不肯作證本犯自必圖倖免此刑求拖累之所由來也今惟有申明定例一法可以稍救此弊查律載衆證明確卽同獄成不須對問然照此斷擬者往往翻控非經問官受賄卽証人得贓以故非有確供不敢詳辦於是反覆刑求則有拷掠之慘多人拖累則有瘐斃之冤請以後斷案除死罪必須有輪服供詞外其軍流以下罪名若本犯狡供拖延至半年以外者果係衆證確鑿其證

人皆係公正可信上司層遞親提覆訊皆無疑義者卽按律定擬奏咨立案如再京控上控均不准理等語臣等查外國案以證定中國案以供定中外情形不同近來各州縣遇有狡供之犯輒非刑拷掠慘不忍聞其或犯供忽認忽翻案懸莫結必至妨廢多家之生業牽連無數之旁人迫犯供輸服而拖斃者已累繁矣況乎三木之下何求不得且恐有畏刑誣服者供以刑求流弊滋多例內本有實在刁健堅不承認如犯該杖罪以上取具衆證明文原奏所稱惟有申明定例可以補救其弊等語真爲確切之論夫既非死罪又有衆證兼有覆勘案情斷不至全行顛倒倘再翻控希圖拖累實爲刁健之尤誠不可不杜其漸臣等公同酌議應如該督等所奏嗣後斷案除死罪必須取具輸服供詞外其徒流以下罪名若本犯狡供不認果係衆證確鑿其證人皆係公正可信上司層遞親提覆訊皆無疑義者卽按律定擬奏咨立案如再京控上控均不准理似此則聽訟不用刑訊無辜免受拖累抑臣等更有請者欲清訟源非切實舉行警察不可警察行之如籌不特除奸禁暴可以消患未萌抑且平日之良莠若何行蹤若何莫不周知原奏謂外國警察之法最密故證據多誠非虛語然必須實力奉行方不至外貌徒襲相應請旨飭下各省督撫嚴飭所屬認真辦理警察漸次推廣庶於地方大有裨益而訟獄亦可日見稀少矣又查原奏修監羈條內據稱州縣監獄之外又有羈所狹隘污穢凌虐多端時疫傳染多致瘕斃仁人不忍睹聞



等之於地獄外人尤爲痛詆叱之以番蠻夫監獄不能無而酷虐不可有宜令各省設法籌款將臬司府  
臬州縣各衙門內監外監大加修改地面務要寬敞房屋務須整潔優加口食及冬夏調理各費禁卒凌  
虐隨時嚴懲至羈所一項所以管押竊賊地痞及案情干涉甚重而供情未確罪名未定保人未到者定  
例雖無明文而各省州縣無處無之蓋此等案犯若取保則什九潛逃交差則勒虐更甚其勢不能不設  
羈所蓋卽本雍正三年刑部尙書勵廷儀所奏外監以居見羈輕罪之意擬請明定章程各處羈所務須  
寬整潔淨不准虐待亦不准多押至待質者歸入候審所各省多已設立其餘差帶官店等事務須禁絕  
此事之實辦與否有房屋可驗不能掩飾等語臣等查例內載明牢獄禁繫囚徒鎖鑰常須洗滌席薦常  
須鋪置冬設暖床夏備涼漿日給食米一升冬給絮衣一件病給醫藥定制之初實屬矜恤周至無如府  
臬州縣舉行不力任令典守者恣情剋扣肆意凌虐以致百弊叢生莫可究詰至監內房屋類皆偏窄湫  
隘夏則人多穢積疫癘頻生冬則嚴寒裂膚凍餒交迫煩斃相繼冤苦莫伸又復私設班館等項拘押干  
連人證及輕罪人犯其酷虐與牢獄如出一轍該督等洞悉情形故原奏於監獄之弊抉摘無遺自非改  
弦更張切實整頓不足以收實效應如所奏請 旨飭下各省督撫將軍都統府尹設法籌款將臬司府  
臬州縣各衙門內監外監一律大加修改地面務須寬敞房屋務宜整潔一洗從前積弊並優加口食及

冬夏調理各費以示體恤禁卒人等倘有凌虐情弊卽行從嚴懲治至廳所一項既據該督等奏稱各省州縣無處無之與其空懸厲禁致各直省陽奉陰違何如明定章程尙可以隨時考察亦應如所奏嗣後廳所務須寬整潔淨不准虐待亦不准多押違者比照凌虐罪囚及淹禁律分別加等治罪其臬司提案候審者歸入待質公所此外如差帶官店食銷班館等名一律嚴行禁絕再各該省監廳修改完竣之後應由各該督撫派委員分投查驗確實如有空言塞責或敷衍了事卽一面罰令該府廳州縣改修一面參處並令將修改查驗情形詳細奏明咨報刑部以備稽考庶此後監廳頓改舊觀而民命無虞淹斃矣又查原奏派專官條內據稱監廳一事固須屋宇廣潔尤須隨時體恤禁絕凌虐必有專官司之方有實濟吏目典史於州縣不能考察各府皆有同知通判所司清軍鹽捕水利等事久成具文一無實事按今之通判宋亦名通判或名簽判謂之推官皆兼管獄囚訴訟擬請著爲定章每府卽派實缺同知專司稽察各屬監廳之事同知不同城者派同城通判每兩箇月內徧赴所屬外縣稽察一次同城兼有同通者兩員分往一月稽察一次同城縣監十日稽察一次如監獄未善凌虐未禁者准其據實稟明督撫臬司比照濫刑例參處稽察府監實成本道司監由督撫隨時委員稽察等語臣等查例載府廳州縣有監獄之責者除照向例設立循環簿填註每日出入監犯姓名申送上司查閱外並令與專管監獄吏目

典史等官各將監獄人犯填註案由監禁年月造具清冊按月申送該管守巡道查核如有淹禁濫禁情弊卽將有獄官隨時參處仍令該道因公巡歷至府屬州縣之便親提點驗如有填註隱漏者將有獄管獄官一併參處並令該道每季將清冊彙送督撫臬司查核若府屬州縣有淹禁濫禁情弊該道未行揭報經督撫查出或別經發覺將該道一併交部議處等語定例本極周密無如府屬州縣奉行不力日久視爲具文其有濫禁淹禁及凌虐情弊該管巡道亦習而忘之而大吏更無從知覺無怪監獄之弊日積日深至該道因公巡歷親提點驗更屬事不恆有例成虛設亟應酌量變通特派專官以司考察另設專條以資遵守應如該督等所奏嗣後每府卽派實缺同知專司稽察各屬監羈之事同知不同城者派同城通判每兩箇月內徧赴所屬外縣稽察一次同城兼有同通者兩員分往一月稽察一次同城縣監十日稽察一次如有監羈未善凌虐未禁者准其據實稟督撫臬司比照濫刑例參處稽察府監責成本道司監由督撫隨時委員稽察惟立法期於詳備務須力求實際方能日起有功全在各該督撫臬司認真經理嚴飭所屬各府同知通判切實考察以專責成並令該同通將每月每次稽察各縣監羈有無淹禁濫押及凌虐情弊逐一詳細註明按半年申報該督撫臬司查核倘該同通稽察不實及循隱不舉者卽據實一併參處上司各官不卽奏參照循庇例議處仍令今年終彙報刑部以備稽察似此則獄囚咸沾實

惠而積弊可期廓清矣以上四條臣等按照原奏悉心核議如蒙 俞允卽通行各省一體遵照辦理再  
此次修訂律法頭緒紛繁所有訴訟裁判監獄諸法如有未盡事宜應隨時參酌奏明辦理得 旨如所  
議行○甲午諭昨據伍廷芳沈家本奏擬復恤刑獄各條請飭禁止刑訊拖累變通笞杖辦法並請查監  
獄羈所等條業經降旨依議惟立法期於盡善而徒法不能自行全在大小各官任事實心力除穢蕪庶  
幾政平訟理積習可回竊聞各省州縣或嚴酷任性率用刑求或一案動輒株連傳到不卽審訊任聽丁  
差賄賂擇肥而噬拖累羈押凌虐百端種種情形實堪痛恨此次奏定章程全行照准原以矜恤庶獄務  
伸公道而通民情用特重申誥誡著該督撫等嚴飭各屬認真清理實力遵行仍隨時詳加考查倘有陽  
奉陰違再蹈前項弊端者卽行從嚴參辦毋稍迴護瞻徇其各勸求民瘼盡心獄訟用副朝廷恤下省刑  
之至意將此通諭知之○乙未錫良奏查神拳一教惑民最速往歲資陽等縣疊釀巨案蔓延廣遠逼近  
省垣用兵幾及一年爲禍甚烈奴才到任後飭屬常加查禁久未敢逞惟該教易習易散習則爲匪散則  
爲民婦孺又皆能之故雖曾永絕根株也加以游惰實繁奸黠者或以仇教爲名或以防變保家爲說符  
咒欺誘昏愚迷信愾欲藉端滋事恣其毒虐去年富順縣朝天寺等事若非迅雷勿及又將釀患匪輕奴  
才前曾將該團保等奏獎卽以策勵後來十二月間有署犍爲縣知縣李端榮訪知縣屬文家山有張老

三尊習學繼往格殺並獲其兄張潮漢懲辦詎本年正月傳習尤盛聚黨衆多蓄謀滋大李端舉率勇查拿該匪事破情危分股突起初亦託名仇教繼以附近教堂均已防護無從窺犯遂指各場新辦小學堂爲洋學肆意打毀先將縣成場等處之學童師範生羅保正等殺害甚且屠戮家口復思奪取精利鎗砲二月初四日乘靖川砲船道經縣屬石板溪登船殺擄該船衆寡不敵管駕史久預等並死於難續備右軍左營哨弁徐國楨楊占元率勇馳至與匪接仗多有擒斬該營管帶朱登五亦來奮剿並經差弁李清廷在牛心山將匪擊退初六日該匪一從鎮江渡來者千餘人一從真武山來者數百人均撲獲爲縣城幸朱登五先到城督隊迎剿自朝至暮酣戰於城外鳳凰山稍卻復聚適徐國楨等正從唐壩口勝匪而至夾擊尤力匪衆奔北是役也殲斃悍黨四百餘人斬賊數十生擒相若奪獲鎗砲符籙旗幟等件此後餘衆竄據鐵山龜頭寨等處又紛擾榮縣之新橋場抄毀民教十餘家殺斃張三閻等先是奴才聞警明知小醜不難剪滅但教堂林立教士齊來不早截不必滋他患復據續備中軍統領柴作舟暨飭右軍統領樊溥霖分道並出期於速就殄除初八初十十四等日樊溥霖殲匪於縣城鋪而所部朱登五仰攻龜頭寨等處匪以死拒皆能不避礮石奪險窮追柴作舟又督帶黃啟文等冒霧進攻掃蕩鐵山生擒首匪王子田蔣真山等由是山寨一無匪蹤四出搜捕專清餘孽伏查此次殲匪假妖妄以創亂繼

椎魯以成衆打毀學堂等項戕殺并誘諸人並敢犯縣城抗據山寨凶惡一時頓熾獨幸赴機奮迅并勇俱稱驍果所戰皆捷其始股多黨悍雖次陣斬首要袁邦才胡國安三腦子王靈關張大木頭吳學富等老軍任裕隆並將擒獲之王子田蔣箕山妖僧高自明等訊明正法懲惡漸盡餘衆遂已畏懼潰散兼旬之內地方悉就安平教堂教士俱得保護無恙尙堪仰慰 宸廑所有尤爲出力各員并自應優給獎敘以勵有功合無仰懇 天恩俯准將四川梓潼武進士朱登五免補守備本班以都司留川儘先補用五品軍功徐國楨儘先補用李清廷楊占元楊萬福均免補把總以千總儘先補用督標左營右哨都司把總黃啟文免補千總以守備儘先補用以示鼓勵至署僉爲縣知縣李端榮失察境內拳教滋事實難辭咎惟該員屢經拿辦又復會合防軍擒渠獲醜功過尙足相抵現仍責令將在逃匪黨再行弋獲多名以觀後效如涉玩泄卽行嚴參奴才又已剴切示諭並通飭各屬毋任拳教傳習認真防範俾遠邇共臻靜謐此次尙有應保員弁並被戕管駕吏久預以及傷亡勇丁另行分別奏咨獎恤得 旨朱登五等著照所請獎勵仍著嚴拿逸匪分別懲辦○丙申 上諭 奉先殿 壽皇殿行禮○還頤和園○命周馥往江北籌辦吏治海防河工捕務○丁酉兩○岑春煊等奏臣春煊於光緒三十年十一月十八日欽奉電傳 諭旨李經羲電奏悉據稱廣西匪股旋撲旋熾實因鎮碼之多惟有誘戰設計嚴斷接濟不贓自戢

核計戰功應以多奪快鎗快礮爲上分營分哨實報實核并知登時奏獎兵知立給優賞鎗礮全數繳驗不准留營各營存鎗先編號烙印報查如有購鎗冒獎及虛報失鎗旋實稱得鎗與奪獲匪鎗匪不盡繳者嚴查正法等語匪根既絕匪患自清藩岑春煊李經羲卽照所陳各節督飭認真辦理餘依議惟民間團練快鎗留以防匪應如何分別查存以免兵勇差役藉端訛詐騷擾仍著該督撫等妥籌辦法欽此伏查西匪之悍全在於鎗匪中購鎗每支出價數十元至百餘元購彈每顆出價五六角至一元不等厚利所在營團以及奸商往往私售接濟其收購之廣既如此及其與官軍接仗每以十餘匪共護一鎗中若擊斃鎗又歸乙其惟恐失之也又如彼迫至大敗官軍搜之甚急則悉埋其鎗礮於深山曠野中留爲後用以故官軍雖勝新賊尙易奪鎗甚難故欲清匪源奪鎗較新賊爲尤要以有鎗則民皆可匪無鎗則匪亦爲民現值全省股匪一律熾平尤宜趁此兵威將餘匪隱匿之鎗及營團商民存儲之械分別查明搜繳爲久安長治之謀臣春煊於上年六月曾定奪鎗獎賞章程但係優給花紅未經明定保獎茲奉 旨以奪鎗核計戰功具見 聖主鼓舞軍材之至意當與臣經義往返熟商擬訂章程十七條另繕清單恭呈 御覽如蒙 俞允卽當通飭各文武認真遵守查照辦理得 旨如所請行○己亥 上奉 慈禧端佑康頤昭豫莊誠壽恭欽獻崇熙皇太后還海○庚子予崇禮病假一月以特園慎齋鑲藍旗滿洲都

統○庚午議續奏浙江湖州府屬界連蘇省地濱太湖港汊紛歧匪徒最易出沒往往攜帶鎗械駕駛快船闖入內河以圖肆擾原設鎗划船不能適用擬仿照蘇省製辦飛划三十艘以利攻剿下部知之○兵部奏光緒二十七年四月欽奉 諭旨裁汰書吏令各部堂官督飭司員躬親部務等因欽此嗣於二十八年十月陝西巡撫臣升允奏各部辦公本需經費與其暗中婪索居間中飽莫若化私爲公一摺奉 上諭著政務處會同各部將辦公及奏銷經費定章程奏明請旨通飭各省遵照辦理以杜弊端欽此當經政務處恭錄 諭旨黏鈔原奏行知各部將此經費名目澈底清查和盤託出通咨在案臣等公同商酌決然將書吏裁盡上年七月初八日業將裁吏辦法恭摺奏聞奉 旨後各司員深感 天恩逾格暫免公罪三月現在奏咨稿件均各司員親自擬辦查例查案註冊管卷亦係各司員自行經理繕錄摺奏文移登記號簿等事悉由筆帖式自行書寫爭相奮勉自朝至晡不以爲勞然責其役形案牘復使之慮及身家似亦非 朝廷勸士重祿之意近來外務部商部因有津貼事無積壓弊竇亦少臣部辦公經費向僅恃驛站奏銷朋馬兵馬奏銷飯銀劄付飯銀數項各省皆多蒂欠辦公已屬不敷而紙張筆墨等件庚子後久未承領既須自行備辦閭閻署飯食僅戶部幫貼千餘金尙不逮十分之一惟有欽遵前奉 諭旨酌擬辦法以期辦公有資不致竭蹶臣等查考各部情形凡經費有定名有定數者流弊自少吏



部之照數工部之水利俱隨文報解定數外不聞多索是其明證書吏私受之款皆因無定名無定數乃得據以爲奸此時若將其私受名目盡行刪去恐亦不免有從旁影射之弊擬卽仍因其名核定其數免蹈巧立名目之習似於公家有裨且於政務處澈底清查和盤託出原咨亦相符合除將得有各項飯銀逐款開列外並令各司員將向來彰明較著各項名目量爲酌核擬一適中數目繕具清單恭呈 御覽如蒙 俞允卽由 臣部咨行各將軍督撫遵照辦理各項經費或隨案咨解或本員呈繳均隨到隨給回照所辦各款卽爲 臣部辦公及津貼各員之用得 旨如所議行

光緒一百九十三

臣朱壽朋敬編

臣潘鴻鼎恭校

夏四月癸卯朔時享 太廟 上親詣行禮○諭前據翰林院編修臣陳並御史張世培條

陳各摺片所參道員黃錫銓等先後諭令岑春煊李經羲確查茲據查明揭奏奏調廣西候補道黃錫銓

原參徇利腹削各節不盡無據惟人尙有才著革職仍留該省交李經羲詳加查看以觀後效試用知府

程道元聲名狼藉貪黷昭彰著將縣知縣李日謙信任匪人所在騷擾均著革職永不敘用府經歷職銜

盧元溪補用守備李振聲身爲管帶縱兵騷擾均著革職盧元溪情節尤重著卽正法以昭炯戒李振聲

著從寬發往新疆充當苦差永不釋回○甲辰以俄艦至南洋飭岑春煊等通飭所屬預防內亂並實力

保護教堂洋商○諭嚴禁商人運煤接濟俄艦○刑部奏等竊謂除惡固在用猛而折獄貴持其平寬

縱不足戢洩風而枉濫尤有乖治理伏讀嘉慶四年正月十六日欽奉 上諭向來刑部引律斷獄於本

律之外多有不足蔽辜無以示懲及從重定擬并有加至數等者是仍不按律辦理又安用律例爲耶卽

案情內有情節較重朕自可隨案酌定嗣後問刑衙門俱應恪遵憲典專行本律不得於律外又稱不足

蔽辜及從重字樣卽雖字但字亦不准用等因當經軍機大臣會同刑部議定嗣以一切罪犯俱應各照本律例問擬毋得聲明不足蔽辜無以示懲從重加等亦不得用雖但字樣并請嗣後官民人等有犯軍流等罪卽照本律定擬請 旨不得以情重字樣擅擬配發新疆十六年復奉 諭旨令問刑衙門斷罪應照本律飭禁從重字樣應請嗣後除奉 特旨發遣黑龍江新疆等處外其餘罪應軍流人犯須照本律本例定擬不准加重發往黑龍江等處如有實在案情重大罪浮於法仍按本律例擬罪聲明請 旨恭候 聖裁等因纂入例冊在案恭繹 諭旨以斷罪應照本律不得於律外從重爲戒 聖訓煌煌理宜遵守又律內載明獄囚鞫問明白犯罪者在外聽督撫審錄無冤依律擬法司復切實議奏候有回批應立決者委官處決等語是死罪皆應具奏成憲昭然乃日久視爲具文各省審辦案件間有不足蔽辜從重定擬者亦有并不先行奏聞者辦理殊未允協卽如本年正月間兩廣總督岑春煊奏審辦門丁李雲甫等精案詐贓一案遽爾親提正法並不先行議奏在李雲甫等係屬奸惡衙蠹就令盡法嚴懲亦不爲過惟律內載明合奏公事須依律定擬罪名明白奏明原以 朝廷設立刑章內外俱應遵守且部爲執法衙門一切皆有定例可循尤不得不杜其漸李雲甫一案既據該督事後據實奏明自可無庸置議第恐此風一開各省紛紛效尤將例應具奏之案率皆藉口嚴懲親提正法致與定律及歷年 諭旨不

符不特成例虛設且恐冤獄滋多聚而成沴非所以保護國脈感召天和也至官犯發遣新疆去死罪祇差一間向來必須罪應軍流情節較重者始行奏請發遣間有革職杖徒之犯奉 特旨改發新疆者宸衷自有權衡非臣下所敢專擅故自嘉慶年間集定不得擅擬改發新疆之例所有一切官犯其由革職杖徒改發新疆者案不常見其非罪犯已至軍流者從無請發新疆之案乃近來各省審辦官犯往往不問罪名輕重率請遣戍殊非慎重刑章之道將來恭逢 恩赦原案之輕重苟涉含糊則辦理諸多窒礙臣部審司邦審職在持天下之平若不申明實例竊恐流弊無窮謹公同酌議嗣後各省審辦案件除例應恭請 王命先行正法及強盜案內重犯仍照章就地懲辦外其餘斬絞人犯無論監候立決俱應按律議擬具奏不得先行正法倘有不先奏聞竟行斬決者即由 臣部照例參處至罪應軍流之官犯情節較重請照向例發往新疆効力贖罪仍恭候 欽定若罪應革職及杖徒之犯不得以空泛考語並不准以不足蔽辜等詞率請從重發遣新疆庶足以飭法紀而免冤濫得 旨如所議行○乙巳諭岑春煊奏接管粵海關稅務一摺據稱粵海關稅務經張人駿先行接管實能破除情面銳意規畫積弊一清約計盤剝攤餉所得每歲可增出銀四十餘萬兩等語張人駿任事實心深堪嘉尚著交部從優議敘○吳蔭培奏三月二十一日伏讀 上諭伍廷芳沈家本奏議恤庶獄各條業經依議惟立法期於盡善徒法

不能自行全在大小各官任事實心用副朝廷省刑之至意等因欽此仰見 聖朝矜恤庶獄有加無已  
薄海臣民同聲感頌查伍廷芳等原奏凡竊盜皆令收所習藝按罪輕重定以年限俾一技能嫻得以餬  
口自少再犯三犯之人與京師五城教養局現行章程略同五城教養局係前山西道御史夏敦復及上  
年奏定創設五城科道經理之教養之法分粗淺工藝十五科皆擇日用常物一人能作者成本輕則銷  
流自易藝成遣散能自謀生其宗旨在化導頑民與工藝局有別也所成之物出售後應得餘利按成酌  
提歸公餘則存局於遣散日俾作貲本法良意美年來收養罪犯日多內外城竊案漸少明效有如此者  
臣查罪犯習藝所前經刑部分咨各省議令通設近年各省摺報不一直隸於保定天津各設一所雲南  
則省城專設一所大抵偏重省城限於經費不能遍及惟山東河南兩省議由州縣分設因地制宜一律  
開辦已先後陳奏咨部或謂府州縣偏設所慮經費不給奈何夫經費有二曰開辦曰常年臣約略計之  
如直隸一省督臣袁世凱所陳辦法保定天津兩所共容八百人經始為難籌費過鉅若以此八百人分  
撥於府州縣每縣多不過數十人少或十數人開辦之費建廠屋招募匠役丁役以佐貲哨弁領之如本  
地向有官房或善堂酌量擴充籌款試辦事尚易舉常年之費似可援山東直隸章程按缺分優劣攤之  
即以攤款作設所後經費且部行新章軍流徒犯均令收所凡遞解寄監等費可挹彼注茲行之一二年

後成物出售及一切罰錢併陸續酌貼內用但使地方官經理得人實事求是天下甘心爲竊盜者究亦無人化莠爲良當可十得其八合無籲懇 天恩俯念化莠勸工立法無弊 飭下各督撫責成所屬府州縣限三年內各設習藝所仿山東河南章程並參用直隸攤款辦法各令切實舉行天下一律 上諭軍機大臣等翰林院撰文吳蔭培奏罪犯習藝所新章請責成各省府州縣一律分設一摺著各直省督撫飭所屬一體認真辦理原摺著鈔給閱看將此各諭令知之○諭軍機大臣等翰林院撰文吳蔭培片奏警察爲當今急務請飭竭力整頓等語著各省督撫飭所屬認真辦理原片著鈔給閱看將此各諭令知之○丙午調鹿傳霖爲吏部尙書兼署工部尙書○調張百熙爲戶部尙書○以趙爾巽爲盛京將軍○賞劉永慶兵部侍郎銜署理江北提督所有江北地方鎮道以下均歸節制○以潘萬才署貴州提督○吏部奏臣部擬籌公費開單請 旨一摺於本年三月初二日具奏奉 旨依議欽此跪聆之下欽感莫名近日督飭司員詳細考求必確知向來致弊之由熟籌此後除弊之法庶幾若網在綱漸臻清理謹擬辦法六條爲我 皇太后 皇上縷晰陳之一摺更宜裁汰也書吏之盤剝把持皆從來司員不能任事漸至權柄下移弊端百出不可窮詰若不直揭病源部務何從整頓今擬將臣部書吏裁去一切事宜均由臣等督飭司員親手經理竭力經營以副 朝廷整頓部務正本清源之至意一書吏宜給予出路

也竊光緒二十七年四月十一日奉 上諭現在整頓部務所有各部裁退之書吏朝廷格外加恩予以出路著吏部按照向來年滿書吏應得職敘章程妥議辦法以示體恤等因欽此臣等查定章凡役滿書吏以從九品未入流舉筆候選多因缺分遷滯改就他業今既永遠裁撤似可略予從優以示體恤擬請擇其恂謹無過當差最久者以鹽庫各項大使註冊其年分稍淺者以府經歷縣丞州吏目等項註冊與各項應選人員相間輪用以仰副 朝廷政存寬大之至意一公罪宜寬免也臣部書吏約以數百計臣部司員計百數十人其確能任事者不過數十人以此數十人辦數百人之事已屬竭蹶而又甫經交替端緒紛繁恐有無心錯悞偶爾疏漏之處今擬請寬免公罪處分大簡月文法既寬臨事自不致畏難卻步該司員等倘有私索舞文等弊一經查出立即嚴參一賞罰宜明定也賞罰為鼓勵人才之妙用務使賢者思奮不肖知畏然後一人可得一人之力臣部事既分任即實有事歸辦理數月後優絀不難立見擬擇司員之勤能者每月酌給津貼銀兩始終不怠確有理繁治劇之才者由臣等專摺保奏優給臣部班次陞階其庸惰不堪造就者即遵照上年奏定章程分別以原官休致或以他官降補均由臣等臨時斟酌奏明辦理一繕寫宜用士人也所有奏咨稿件即飭各司員親手擬辦查例查案註冊管卷亦飭各司員自行經理惟繕寫摺奏文移登記號簿等事尚須有人臣部已於今歲正月十七八兩日自將臣部

錄帖式傳集面者擇其字畫端整者派司學習仍不敷用擬再招考膳錄專用滿漢舉貢生員出身者每月酌給薪食三年擇尤保獎一次大抵士人尙知廉恥顧身名而又有出路可望宜不致有書吏等招搖朦混等弊如仍不能得力當分別開除究辦以期懲勸兼施一辦事無須引案也臣部成案浩繁最易爲上下舞文之具今擬一切事宜均照臣部則例及奏定章程辦理以前成案盡行封儲無須援引遇有例章未備之件由臣等詳細奏聞請旨遵辦以上所陳就臣等所慮及者略舉數端準此以往較有端緒之可循自此次定軍以後各營滌慮洗心勤慎將事以仰副朝廷殷殷訓飭之至意如蒙俞允卽應遵奉施行至一切未盡事宜仍當隨時請旨得旨如所議行○丁未呂海寰奏現今各國對於中國之外交均以開放商埠爲政策東三省之結局爲全局所關日本縱許我收回各國必主於開放如不得已而開放東三省則接踵而要求者將不止於東三省但開放商埠而不能保固主權卽與失地無異我既不能拒其所請卽不能不早爲之計故臣之愚計預籌開放商埠必須先謀保固主權所謂保固主權卽收回治外法權也臣前歲與劉坤一張之洞盛宣懷與英俄商約第十二款內載中國深欲整頓律例以期與各西國律例改同一律英國允願竭力協助以成此舉一俟查悉中國律例情形及其審斷辦法及一切相關事宜皆臻妥善英國卽允棄其治外法權等語嗣與美日葡三國續訂商約於治外法權一



款均特列入專條誠以修訂全國律例乃更定商律之提綱更定商律爲收回治外法權之要領然非參  
考各國通律斟酌盡善恐外人不能遵守擬請 飭下外務部刑部商部博採歐美律例從速酌擬條款  
并通飭各督撫體察各省情形統籌全局訂明東西通行之法律由法律以審定商律由商律以措施商  
政次第嚴訂細期中外辦法一律既經議定辦法凡議開商埠之應應責成各督撫督同地方官吏照章  
切實奉行始能防後患而收實濟抑更有請者日本商約內有北京開設通商場一事彼此照會存案  
雖有須遵守該處工部局及巡捕章程與其住該處之華民無異等語然華洋異俗風氣不同猶恐將來  
不免受人欺侮況京師重地迥非各海口所可比論是治外法權尤爲近今當務之急此又不可不豫爲  
防範者也臣朝夕思維又目覩商埠租界之情形不勝憤懣深惕主權之失懔前愆後不敢不竭蹶愚忱  
下所司知之○己酉常寧大祀 天於 闕丘 上親詣行禮○岑春煊因病奏請開缺就醫得 旨賞  
假兩月毋庸開缺○庚戌 慈禧端佑康頤昭豫莊誠壽恭欽獻崇熙皇太后 皇上御皇極殿日國使  
臣賈思理覲見呈遞恭賀 皇太后萬壽國書○辛亥 上奉 慈禧端佑康頤昭豫莊誠壽恭欽獻崇  
熙皇太后幸頤和園駐蹕○壬子以德兵艦突至海州測量飭外務部嚴詰德使○諭孫家鼐奏假期屆  
滿病仍未痊懇請開缺一摺孫家鼐當差多年諳練老成朝廷正資倚畀著再賞假一箇月安心調理一

俟假滿卽行銷假○癸丑兩○飭福州將軍崇善嚴守船政廠以防俄艦侵犯○甲寅電飭新疆伊犁吉林各將軍巡撫厚集兵力嚴守中立○諭商部奏遵行會查路礦款項大概情形開單呈覽一摺蘆漢鐵路關繫緊要商部與世凱督飭盛宣懷認真整頓安定章程剔除弊竇力祛浮濫嗣後一切出入款項事宜均著責成商部嚴切稽查務求核實以重路政而裕利源○乙卯前兩廣總督譚鍾麟卒賜卹如例尋予諡文勤○以薩鎮冰爲廣東水師提督○九周浩請予戊戌案內已革湖南巡撫陳寶箴開復原銜○諭軍機大臣等有人奏衛所裁撤請飭將劈分清查繳價等事上緊施行限期具報並將把持串通舞弊之委員書役伍丁等認真查究等語著周馥按照所指各節查明辦理原片著鈔給閱看將此諭令知之○丙辰召奉天府府尹廷杰回京○丁巳以李準署廣東水師提督○辛酉伍廷芳等奏臣等議復兩江總督劉坤一等恤刑獄各條於本年三月二十日具奏奉 旨依議欽此復於二十一日恭讀 嚴諭責令各督撫認真清理實力奉行仰見 朝廷矜恤庶獄之至意悚佩莫名竊維立政之本綱紀不容或寬而化民之方教養尤難刻緩是以屬官圖土職事施及罷民漢代律章輸作獨詳城旦於罪隸之中猶加以陶育冀其困悔法至美意至良也查近來各直省各案以竊盜爲最多定例竊盜贓四十兩以下科罰僅止杖笞折責發落久等具文犯者以身嘗試習知國法不足畏釋放之後再犯三犯者有之積案迭

竊者有之結夥持械行劫者又有之推原其故半由於地方官不知教養半由於定律過輕雖昭懲創現在笞杖改折罰金自係由于矜全啟發其羞惡之心第此等刑制宜於輕罪人犯及無知犯罪者獨竊盜以擷取爲事犯罪之念蓄於平日論其贓雖有多寡之殊誅其心實無重輕之別而此項人犯大率游蕩無業本難期罰金之可以照納況竭彼盜泉充茲贓罰揆之於理尤未適也罰金無力免繳代以習藝泰西各國名爲換刑換刑之習藝與徒流之習藝性質雖一究有久暫之分歷時未久既難望其舊染之戒除且恐倉遽之間技藝亦未嫻熟刑期滿後難保不復蹈故轍考今世各國刑法竊盜之罪法蘭西處懲役德意志處禁錮或十年以下之懲役比利時處一月以上五年以下之禁錮英吉利處五年以下之懲役或二年以下之禁錮附加苦役及黑牢日本處二月以上四年以下之重禁錮其餘各國大致相同間有並科罰金者非通例也臣等公同商酌擬請嗣後凡竊盜應擬笞杖者改擬工作一月杖六十者改擬工作兩月杖七十至一百每等遞加兩月徒罪以上仍照向章辦理此外以竊盜論准竊盜論及各項囚盜間擬笞杖並搶奪強盜案內擬杖者俱准此至各省習藝所如有尙未設立者即將現犯照應得工作期限暫予監禁仍令通飭各屬一律從速舉辦並將已立各所奏報分咨刑部備查似此量爲變通藉刑罰代教養頗具可收率化之功以教養清盜源草野可事乂安之樂似於公安私益兩有裨也再各國刑

法竊盜從無間擬死刑者卽唐律不過加役流明律亦罪止滿流賊重人犯應否酌減之處容臣等於新律內酌量核定合併聲明得 旨如所議行○壬戌與英國續訂滇緬通電約款○江西按察使陳慶滋緣事解任○諭軍機大臣等江蘇松江府知府丁之斌著該撫留心察看究竟能否勝任再行出具切實考語將此諭令知之○政務處奏請裁撤各省復設教職得 旨允行○周馥奏前准商部咨本部具奏在籍翰林院修撰張謇條陳漁業公司辦法一摺奉 旨著商部咨行沿海各督撫妥籌辦法欽此恭錄咨行查照務將籌辦情形迅速咨覆爲要等因准此當經照會該修撰招商妥籌酌辦並咨行沿海文武各地方遵照在案茲准修撰張謇函稱漁業公司事業與漁道熟商先規大略擬招集商股用新法捕魚購德人拖船試辦以上海爲總局另設江蘇分局五處浙江分局十處以保護舊有之漁業保全中國之漁權爲宗旨議定大概節略設局開辦俟規模粗定再彙集各國章程參考中國風俗沿海七省商情細訂呈核請先行具奏等情前來臣查歐美各國海濱之地漁業實爲大宗既有水族院考求種類之方復有養魚書詳繪鱗介之狀取魚之法數畧之禁設會研究日異月新民受其益而國家亦收其利英與法既各限兩國捕魚之權美與英又合訂北海捕鯨之約因漁業致啟交涉於是特重海權中國濱海七省海綫長七千餘里恃漁爲生者無慮數十萬人然皆循用舊法網具笨拙自應設法改良以圖利源而振

商業該修撰現擬專集華股講求新法仿西人船式并各國電燈法以電取魚先就江浙兩省爲始以次推廣直奉山東閩廣等處務使遵海貧民均享公共之利益華商聯絡預收應有之海權詳核所呈節略尙屬周妥自應准其照議開辦並飭沿海關道督飭地方文武認真保護向來衙門陋規相沿成習應一律廢行革除仍飭俟訂立詳細辦法具詳到日再行咨請商部核示該修撰又議建水產商船學校各項事宜已飭會同上海道妥議章程繪圖詳報再行核定飭遵臣維振興漁業本以保全海權爲要義然查西國海權以潮退三海里爲限英法等國海峽甚狹海濱小島亦多近岸中國沿海島嶼星羅棋布其有相隔百餘海里者烏無大小遠近皆漁人託業之區趁潮往來不分界限若僅以潮退三海里爲限則名爲保護反感海疆不如仍行我向來領海之權較爲上策此不能不揆時度勢深思遠慮預爲聲明者也此節應如何取益防損之處自當與該修撰審慎籌議以維大局得 旨如所請行○癸亥調余張康爲江西按察使以連甲爲山東按察使○甲子俄國逃艦六艘駛入吳淞尋一律下旗聽受約束○貴承辦京師勸業銀行前太僕寺卿林維源侍郎銜○商部奏商業以信義爲體以母財爲用現今市面日緊各省人民風俗日益澆漓奸商倒欠之案愈出愈奇地方官輒視爲錢債細故不爲清理信義不孚銀根愈緊商業所由不振也臣部綜司商政若不實行保護之政卽提倡亦徒託空言自非清釐商人詞訟不足

以除積弊而戒因循查光緒二十九年八月初六日欽奉 上諭現在振興商務全在官商聯絡一氣以信相孚內外合力維持廣為策勸以期日有起色等因欽此又是年九月初一日臣部奏請通飭力行保商之政一摺奉 上諭中國自互市以來商務日盛現在設立商部正宜極力整頓相與維持惟中國商民平日與官場隔閡情誼未能遽孚而不肖官吏或且牽掣抑勒遇有詞訟不能速為斷結辦理不得其平以致商情不通諸多阻滯著各省將軍督撫通飭所屬文武各官及局卡委員一律認真恤商持平辦理力除留難延擱各項積弊以順商情而維財政倘有不肖官吏仍前需索留難著隨時嚴查參辦勿稍徇隱等因欽此欽遵各在案上年如上海福懋祥商號倒欠漢口上海各莊欸四十三萬兩商情惶惑經臣部咨行南洋大臣江蘇巡撫主持嚴辦始得減成歸結卽為中外合力維持之明效乃近年如江西豐豫亨一案熊心衡一案山東合德號一案江甯大德莊一案均由臣部行查各該地方官有閏六七月未覆者有閏四五月未覆者疊經臣等督飭文電交催仍復任意遲延案懸未結實屬疲玩已極查定例載各部院行查外省事件俱以接到部文之日為始除扣去屬員查覆往返程期外統限二十日出文咨部其有必須輾轉行查限一箇月內出咨若係一時不能確數者卽於限內先行咨部展限如有遲延照事件遲延例議處等語現在江西等省辦商人詞訟如此遲延實屬顯違定例又如路政商務航業農

務土貨製造工藝各項事宜均爲國家要政刻不容緩之圖彙經臣部通行各省切實督催招商設立公  
司趕緊興辦無如外省官吏除南北洋河南廣東各省業經次第籌辦外其餘往往視爲具文屢催罔應  
至於保護商人一事臣等於接見外埠商人時屢經詢及無不疾首感額於地方胥役劣紳之需索刁難  
種種苛擾上年太僕寺卿張振勳到京時臣等又詳詢外洋僑民情形該京卿亦謂保商之政不在空言  
若官吏需索之弊一日不除則商務斷難起色等語恭查光緒二十九年十一月初四日內閣奉 上諭  
商部奏出洋商民回華請飭保護各摺片出洋華商疊經諭令該督撫切實保護逐漸推廣若如所奏華  
商回籍後地方胥吏遇事刁難里族羣民藉端苛索勒詐種種積弊成何事體亟應嚴行查禁實力保護  
等因欽此當經臣部恭錄 諭旨行知遵照並分別咨行各該省督撫一律妥定章程奏明辦理在案迄  
今一年有餘惟兩廣總督鈔錄保商局章程咨送到部此外各省並無隻字聲覆即福建省保商局曾否  
改定章程辦理有無成效亦未據奏咨有案伏念 朝廷重視商政屢奉 諭旨殷殷誥誡各省大吏宜  
如何仰體 德意督飭屬吏實力振興況目前商政基礎雖立而閭閻風氣未開尙多觀望全賴部臣驅  
吏相與悉心合力提倡經營或可圖收速效乃臣部設立甫經年餘在各省督撫中之通達時務者尙能  
協力維持而故見自封者或且視爲多事反存懈怠之心如此情形臣部辦事無從措手應請明降 諭

旨通飭各直省將軍督撫嚴飭地方官嗣後遇有商人詞訟秉公迅爲理直毋許延擱拖累並查照光緒二十五年刑部議覆兩江總督奸商倒騙定例治罪成案辦理仍隨時咨明臣部立案其江西等省未結各案應由臣等再行電催限一月內清結不得再事延玩以恤商情至於各項商政尤應一律趕緊興辦出洋華商回籍應恪遵迭次諭旨切實保護逐漸推廣並釐訂章程迅速報部總期力除壟隔百廢俱興倘再有前項積壓留案等弊應請照例子以應得處分以挽頹風而肅商政上諭商部奏請整頓商務一摺據稱路礦農工等項均爲近今要政各省往往視爲具文至奸商倒欠之案經該部行查各該地方遲延不報華商回籍仍復任意留案等語現當振興商務亟宜加意整頓著各該督撫等嚴飭地方官遇有奸商倒欠訟案剋期訊結各項商政一律實力興辦出洋華商回籍懍遵迭次諭旨切實保護不准刁難留案如有前項情弊著該部照例參處以挽頹風而肅商政○丁卯電飭各省實行欽定陸軍營制○袁世凱奏山東濟南城外暨附近濰縣周村兩處前經臣世凱會同正任撫臣周馥奏請自開商埠並陳明應辦事宜俟議准後再由臣等飭議章程奏咨開辦等因欽奉硃批外務部議奏欽此旋准部咨以濟南城外既爲膠濟津鎮兩鐵路交接之區地勢扼要商貨轉運自屬便利所請自開通商口岸核與成案相符其濰縣周村均爲膠濟鐵路必經之道應一併開通商埠議覆照准奉旨依議欽此欽遵



咨行前來伏查濟南等處自開商埠與約開各埠不同且爲陸路通衢亦與江海口岸有別經臣世凱正任撫臣周馥及臣廷幹先後往復籌商擬就濟南西關外膠濟鐵路通南東起十王殿西至北大槐樹南沿長清大道北以鐵路爲限計東西不足五里南北約可二里共地四千餘畝作爲華洋公共通商之埠准有約各國在該處設立照料商務之官員准各國商民任便往來租地設棧與華商一體居住貿易其商埠定界以外所有城廂附近各處仍照內地章程不准洋商租認房屋開設行棧至商埠界內應設之工程巡警暨審理詞訟等事本係地方應有之責擬均歸濟東泰武臨道就近監督開埠之始首重招徠議將稅關暫緩設立所需各項經費先由華官自行籌備應抽之房鋪車輛等捐查看情形照各埠通例依次舉辦現就濟南省城設立商埠總局遴員分別經理臣等公同商酌請先擬濟南商埠開辦章程九條繕具清單恭呈 御覽至章程內應辦各事仍須酌訂詳細專章俾資遵守其濰縣周村兩處開設分埠擬定參仿濟南章程辦理下所司知之○政務處奏本年四月初五日准軍機處鈔交署兩廣總督岑春煊奏請添設巡道並將糧道等缺分別裁改一摺又請升崖州爲直隸州知州一片均奉 硃批政務處吏部議奏欽此查設官分職貴因時因地而制宜屆東自通商以來口岸屢關交涉滋繁邊防亦日形喫重一切情形多係視昔遷變原設各道缺或控制難周或管轄不便或事務過簡自應酌量添改裁併

以重地方上年九月間湖廣總督張之洞請裁糧道添設施鶴道當經奉 旨允准今該署督等擬請裁撤廣東督糧道添設欽廉兵備道駐紮欽州管轄廉州一府欽州一州以糧道原轄之廣州府佛山赤溪二直隸縣改隸肇羅道更名廣肇羅道移駐省城以原屬雷瓊道之雷州府原屬肇陽羅道之陽江直隸縣連同高州府歸原設之高廉道管轄更名高雷陽道仍駐高州原設之雷瓊道更名瓊崖道仍駐瓊州均爲因時因地裨益治理起見應請照准其所請廉欽道廉俸卽以裁缺糧道改支暨廣州府經歷撤銷兼管糧庫名目裁兵節存米價由各州縣經解司庫存撥糧道原管稽徵各項奏銷概由藩司辦理所議亦均妥協再該督等片奏請將瓊州府屬崖州知州升設直隸州一缺係因與附近該州之感恩昌化陵水三縣萬州一州均距府治過遠管轄多有不便與臣等前經議准山東升設膠州直隸州河南升設鄭州直隸州情事相同亦請照准所有原屬該府之感恩昌化陵水三縣及萬州改設萬縣均歸崖州管轄俾便控馭而符體制至所擬添設之廉欽道請作爲衝繁難要缺由外改補崖州改爲衝難煙瘴要缺吏部查定例道府題調要缺令該督撫由外揀補准其升調兼行今據署兩廣總督等請添設廉欽道定爲衝繁難邊遠要缺由外擇其地相宜者酌量升調揀補以資治理此缺既已升調兼行是否卽作爲題調要缺又片奏崖州升爲直隸州萬州改爲萬縣查崖州原係難簡調缺今升爲衝難煙瘴直隸州要缺

萬州原係疲要調缺今改爲縣缺兩缺題調字樣是否仍舊抑或增改均應令該署督奏明辦理至所稱擬改之瓊崖道高雷陽道廣肇羅道均係將轄屬分別增減改隸並非裁缺各缺現任人員應請一仍其舊自應准如所請惟崖州知州萬州知州今既將缺分升改現任人員是否仍舊亦應令該署督等奏明核辦得 旨如所議行○庚午諭陳夔龍奏考查辦理學堂各州縣分別舉劾一摺河南永城縣知縣周雲舞陽縣知縣李文烈均著傳旨嘉獎前署延津縣知縣韓厚瀛前署鎮平縣知縣郎益厚在任經年於學堂要務延不舉辦實屬因循著以府經歷縣丞降補以示懲儆○辛未夏時奏富國恃乎商通商恃乎工五行百產轉運者商也製造者工也今欲抵制外人而我拙彼巧我粗彼精我舊彼新我遲彼捷價則我貴彼賤貨則我滯彼通不而振興益滋困敝勸工之道東南各省業已日見精良北則京津西則川蜀廠中製造超衆軼羣惟有陝西民智錮蔽工皆樸僿器鮮奇新每以本地產生之財資外人製作之料毛鬣骨角之屬外洋收之反手而得鉅金棉花藥材之屬鄰省收之製練而求善價已所有者一一流於外己所無者物物求諸人一出入間耗失非細固民之性質鈍亦官之教督疏也上年冬藩司樊增祥札委署西安府知府尹昌齡創設工藝廠略仿蒙學之例從小處粗處淺處易處入手挑選少壯無業者白人入廠學習陝西不惟民智未開卽官智亦待啟試辦之始人皆非笑以爲事必無成尹昌齡氣銳志堅率

同局員馬兆森等董督工師居肆治事局員各竭心思學徒咸知勸奮臣到任後迭加敦勉不戒而手數月以來若竹工木工草工針工外就其數之所近以呈能各得其師之所傳以成器雖皆粗淺頗利行銷而漸進精良者則以氈屬爲特出蓋畜羊剪毛以製氈本陝人之故技特工料偷減製不求精效由廠員教督揀毛務純壓片務薄染色務鮮印花務細製爲衣物人爭購之近有訂購至數百牀者亦可見技無不可學民無不可教惟視辦事認真與否查工藝一事重在製造土貨地所不產與產而不豐者皆可從緩現定簡易章程以氈毯爲首次則棉花居土產之多數而秦人不自紡織專以淨花運行川省近來局中改用洋紗陝花遂無銷路現已派員赴滬訂購紡紗織布各機教之織作以處處屯積之花作人人章身之用既可抵制洋販併堪銷售鄰封又次則南山出漆而箱篋盤盒几案椅櫈之屬可製也華山多竹而簾篋篋盤篋等宜紙之屬可造也又若棉紗織帶割羊爲裘牛革打箱猪鬃製巾因地取材因材製器因器執工因工謀利使物物皆盡其用而地無棄物人人自食其力而國無游民此固設廠之通義而尤大有益於黎民者也現已於川招紙匠於隴雇毯師於閩覓漆工分類傳習諸端並舉其始務在收斂未敢鋪張僅就 行宮左側之養馬場搭棚蓋宇小試其端近則製作稍精衆情踴躍不日工師紛至門類增多非別購廠基展寬局勢不能安機器而來百工現於西門外得地一區由藩司力任其難籌款興築

一俟廠屋落成機器運到工師齊集卽添募學徒日省月試局則由小而大器則由粗而精藝則由淺易而漸造乎深且難迨至難者深者精者皆能爲之而黎民無愚不智亦不患其貧矣下部知之○是月美利堅國新簡駐華使臣柔克義抵任

五月丁丑呂海寰奏近年各省教案棘手動輒釀成交涉請特派專使前赴羅馬面謁教皇議訂新約得有外務部查核辦理○庚辰刑部奏前准政務處咨前兩江總督劉坤一湖廣總督張之洞會奏變法第二摺恤刑獄一條與現在修改刑律足資考證摘錄原奏咨行前來查原奏恤刑獄酌擬九條除教工藝等條前經臣部另行奏准通行省刑責等條業由修訂法律大臣核議具奏外其恤相驗一條經修訂法律大臣議由臣部奏明辦理查閱該督等奏內稱凡有命案應相驗者驗屍棚廠官吏夫馬之費甚多均取之被告家不足則派之族鄰小村單戶派之一半里外之遠鄰間有恤民之吏自備夫馬廠棚嚴禁差役科派然亦不過百之一二終無禁絕之法查四川有三費局由紳民糧戶捐辦一爲招解費一爲相驗費一爲夫馬費民甚便之行已三十年此事自宜令各州縣就地籌款務以辦成爲度仍責州縣輕騎簡從不准縱擾違者嚴參等語臣等查例載凡人命呈報到官該地方印官立卽親往相驗職許隨帶仵作一名刑書一名皂隸二名一切夫馬飯食俱自行備用並嚴禁書役人等不許需索分文如該地方

印官不行自備夫馬取之地方者照因欠科敘律議處該役需索者照例計贓分別治罪等語定例本極周濶是以臣部歷年以來遇有內城及香山等處各營房旗人命案飭令當月司滿漢司員帶同伴作前往相驗每名酌給館食京錢數千其夫馬皆由該司員等自備驗畢卽回伴作人等不離左右無從需索遵循至今尙覺風清弊絕似毋庸另立相驗費名目至各省督撫如果關心民瘼展飭所屬州縣遇有命案相驗一切夫馬飯食照例自行備用並嚴禁差役需索違者參處治罪該官吏差役人等自不至科派無所顧忌若如原奏命案相驗官吏夫馬之費甚多均取之被告不足則派之族鄰小村單戶則派之一半里外遠鄰實屬大干例禁若不亟圖整頓何以除積弊而恤民生該督等洞悉情形欲籌絕妙之法採用四川三費局章程法至良意至美應如所奏請 旨飭下各省督撫體察地方情形一面咨取四川省三費局章程仿照斟酌辦理一面咨令各州縣嗣後遇有相驗毋許差役科派需索有犯按照律例分別議處治罪仍令各省將辦理此項驗費詳細情形咨報臣部以便查核總之恤民之吏輕騎簡從夫馬所費無多卽無公費斷不肯科派累民若遇不肖州縣卽有公費難保不從前縱撥總在各督撫隨時認真稽查有犯必懲則鄉民可免科派之累矣得 旨如所議行○商部奏光緒三十一年四月初一日准軍機處鈔交御史王振聲奏請變通官刑廠改設教養局一摺奉 旨該部議奏欽此查原奏內稱京師舊

濟堂功德林兩粥廠原爲收養老弱非養游惰也上年監放粥廠逐日察看每廠收養二三百人遞增至五百餘人所謂老弱廢疾爲數無幾大半皆少壯游惰之人每日兩次飽食出而游蕩聚處怡然夫此輩少壯既得其所而實在老弱廢疾轉或不能相容與其徒費無益不如因而變通查五城設立教養局拘收初犯輕罪之民給以衣食教以粗淺工藝頗著成效擬請飭下順天府援照辦理將舊濟堂功德林兩粥廠改爲教養局收養貧民教以粗淺工藝該兩處各有房室七八十間每年撥米一千二百石並由崇文門撥給銀二千兩自十月開辦至次年三月止計施粥半年若改爲教養局自係長年且加工藝經費恐有不敷合無仰懇天恩賞加銀米如再不敷卽在順天府備荒經費內撥補毋庸另籌款項等語臣等竊維朝廷恤民之政教養兼資若有養而無教蚩蚩者氓轉以衣食無虞不謀生計而閑散游惰之輩日以加多故戶部於本年二月間議擬兩江督臣賑捐接濟粥廠摺內瀝陳情形既詳且備蓋深

有見乎教養之不可偏廢也查五城教養局收留輕犯實習粗工藝成令自食其力注意在化莠爲良雖與工部工藝局招募傷斃藝徒教以美術工業宗旨各有不同而收效則一順天府所管舊濟堂功德林兩處設自康熙年間庚子後不無殘缺經臣等在順天府尹任內修葺完善歷年冬春兩季施粥施衣本所以宣布皇仁體恤焚獨乃少壯游惰者不無濶跡其間與其徒請博濟之仁施不如並求考工之實

業若就本有之廠基收養窮民分科習藝誠如該御史所稱因而非創簡而易行一轉移間官款不至虛糜窮民漸有生路均擬照准所請應懇 勅下順天府尹查取五城教養局章程體察情形妥定成規趕速舉辦至於常年經費應視規模之廣狹定用款之多寡查普濟堂功德林兩處每年應領崇文門稅務津貼銀二千兩又由戶部年發 恩賞普濟窮黎銀一萬兩內酌量撥用外如尙須接濟銀兩再由該衙門備荒經費項下動支此與賑撫事同一律請准作正報銷至應領米石或有不敷併由該府尹通盤核實應添領若干奏明辦理誠以京師地面遼闊無業游民所在多有若先將該兩處改辦教養局籌款易而收效多於矜恤之中實寓化導之意順天府所管尙有朝陽門安定門西直門三處粥廠應如何改設之處統由該府尹實力籌辦徐圖擴充以仰副 聖主子惠元元有加無已之至意得 旨如所議行○

癸未撤廣西柳州轉運局○乙酉周馥奏上海製造局諸事廢弛亟須改良經 旨與北洋大臣商定辦法劃出船塢另派大員經理前經奏明在案查滬廠所造彈丸火藥鍊鋼製礮等事皆由摹仿而成非由心得終未精以上年曾派員匠赴鄂廠考察以期觀摩取益惟良匠難擄且滬廠機器不全非赴外洋細心考驗無從購補查製鎗製礮爲費甚鉅非一時所能驟辦彈丸火藥則須多製以備操防現查南北洋所用各種鎗礮之彈丸無煙藥栗色藥皆爲行軍要需刻不容緩應卽先就現有經費加工精製以儲軍實



一面選派委員學生帶同明練機匠同赴英德各名廠學習請求並考察製造鎗礮藥彈及鍊鋼之法學生未習機器則藉匠人爲目喻匠人不通言語則藉學生爲舌人兩者相成易於深造至稽查約束須人經理查有分省補用道李經敘精練核實堪以委令帶往應如何分駐各廠分習機件俟到歐洲後稟商英德駐使博訪周諮擇定分派所需經費仍就滙廠籌撥但學成歸國至速計須數年工匠不能久開機器不能虛設此數年中擬先僱東西良匠來滬試辦訂立合同約定年限合同期滿華匠學成可以自行製造卽仿日本辦法將洋匠辭退如此前後承接則目前既不曠誤後日更復精良此誠正本清源之計用費雖鉅成效可期臣與北洋大臣袁世凱往復電商意見相同擬卽照此舉辦下所司知之○丙戌上奉 慈禧端佑康頤昭豫莊誠壽恭欽獻崇熙皇太后還時○丁亥 上御乾清宮日斯已尼亞國使臣賈思理美國使臣柔克義親見呈遞國書○以六部增設丞參飭各衙門會議○趙爾巽奏奴才面奉諭旨飭將應行時政迅速擇要奏陳仰見 虛衷圖治之至意奴才何敢以浮詞進謹陳十二事恭候採擇一曰通各國之強在事事不隔人人不隔無一事不合衆而謀無一國不合衆而謀我中國則內外上下之交無事不隔如猜謎如關智往往自相牴牾欲除其弊非先求通不可 宮廷之上非臣下所敢議擬請先自政府始每月應飭軍機大臣定准分班接晤外廷官僚之期或五日一次或七日一次接

晤之日卽作爲休沐免其入值如有要政仍可 召見亦仍請 召對並可一日兩見其政府接晤之處  
必須嚴密不用隨從不用煙茶不作寒暄公事則公言之密事則密陳之已往之事應如何補救現在之  
事應如何處置將來之事應如何預備軍機大臣以是爲問衆官所陳所答亦不外此無事者晤畢卽出  
此外各部院亦宜定互相接晤之所各堂官之接晤本管屬員亦如之政府接晤各官如何分期分班之  
處應由軍機大臣酌定外省督撫至各州縣亦宜定接晤紳商優屬士民之期以通下情而資治理一日  
簡各國之能通山於能簡今欲求通必先求簡如衣冠如出入概從其便如儀從如禮節概從其省如文  
法如款式不必其工如期日如奏事不必全到如公事呈轉不必太煩如要務敷奏不必擇日此外繁文  
末節一切忌諱及各省陋習如儀仗排場請安站班賀喜之類悉令刪除禁革不能備舉一日真內外之  
虛僞相承久矣各省吏治學務之講求其真能成就人才者幾何汰書吏恤刑獄禁用門丁勸勿纏足之  
旨屢下而奉行者不可核也改律例編教科書之 諭疊頒而編上者仍無日也皆非亟加考核深恐  
成效難期他如緊要酌補命盜諸職之奏詞皆成印板到省到部之甄別必曰堪留已用已放之銀糧尙  
列實在捐案之減收融銷分發之填寫違礙因求合例遂成欺飾凡請作僞皆宜汰除惟汰除之後不可  
又以不合例文牽引加駁務使上下內外相見以心無復拘忌一日實如民數穀數田數必須實查實報

如各省歲出歲入必須實報實銷如部核報銷不得憑虛冊而昧實事如行查事件不得空文搪塞以及置之不覆一曰專各省委任督撫一二人可以理全省之事並理兼轄省分之事京中部院則數人而辦一事一人又兼數事或牽掣難行或瞻顧不服欲求事之舉也難矣是必擇官慎之於始責成歸於一人應令責無旁貸一曰分時事至今繁難已極如州縣一身萃兵刑錢穀之任又加以傳教游歷爭礦勘路及學務警務農工諸新政無論不學而仕者茫昧倉皇卽久宦者亦難游刃有餘此則必須酌設分曹另立鄉官佐其任使以飭庶務者也一曰合今日時政本極困難新政繁興遂增公所如內閣政務處皆爲議政之地戶部財政處皆爲理財之地兵部練兵處同爲治兵之地工部工程處同爲營繕之地禮部國子監與學務處判若兩途工巡局既稱得力應合外城而兼治之而與步軍統領衙門統歸於一辦事最忌紛歧今官署公所日苦重疊必致趨者安於廢弛新者亦多觀望是宜斟酌至晉或合新於舊或會舊圖新無事之官汰之不必疑有用之官增之不可緩庶不至貽譏數衍一曰任今日財政雖窘然非無可爲計特患內外不能一心使人不敢任事奴才另有理財專摺請是宜 朝廷有堅定不移之見政府有福禍與共之心然後人敢任事此不獨理財爲然而理財固亦是莫由矣一曰信與國人交莫重於信今百事之難理官民之猜阻皆由於此現直隸督臣奏辦公債票亦歸於必信實則凡事皆宜以信爲主如

兵之必練學之必興商民借款之必還一切新政之必辦皆請 朝廷明示大信加意考察各省修舉者  
褒獎之觀望者策勵之廢弛者懲治之政府以此課督撫督撫以此課州縣自然漸可收效一曰斷古今  
成大功業必在於斷日本維新之始國人亦持兩端惟其君相斷以維新故能日盛蓋新舊不能並行是  
非不能兩立京外官民之趨向全視 朝旨爲轉移近如裁汰官缺裁革書吏籌給司員津貼之類皆係  
奉 旨飭辦多以人言或格或緩刻下事之顯者如貢院議修則學堂議阻私錢不禁則官錢難行凡似  
此者非仰賴 聖明主持樞廷贊決則所擬興革者必無就功之日伏祈 特頒諭旨申明非布新除舊  
無以自治無以圖存遵之者賞違之者罰上以定國是下以一心不獨各國恩侮我之萌卽百務亦易  
臻日新之美一曰知本如練兵固急然不從教育著意則兵無本興學固急然不從女學蒙學辦起則學  
無本宣講爲化民之本警察爲安民之本鄉社爲治民之本農工商爲富民之本詞訟刑獄爲愛民之本  
不求其本雖勞無益知其爲本雖千難萬折亦必達政策之所定而後已一曰重祿各官既不司兼職則  
祿入必須從豐今雖不能驟然徧及亦須擇要增之如京官宜仿照外商兩部外官應令督撫斟酌辦理  
其款項或從新增款內籌助或從舊有款內裁節或在化私款內撥用或先京而後外此可逐漸爲之各  
國官祿較中國多至十倍數倍所以能專心辦事此爲振興百務之本否則皆託空言無辦事之人無自

給之官自強之日不可望矣凡此諸端皆關至計非有驚世駭俗之舉果能廣集羣材上下同心不搖浮  
論事事見諸實行時時持以定力必可收變法之益而無其害此為精神之專注非同形式之鋪張至此  
外未及詳陳惟賴 聖明垂照抑奴才更有請者在今之議新政者或慮流弊易滋或恐人心不順或又  
謂辦事無人籌備各國更新之始大都皆有阻力而其時任事者皆能持以堅固圖其必成則疑者自消  
阻者自服即如中國鐵路電綫之創始輿論亦不謂然其時奴才初入仕途亦懷疑慮然昔之疑慮者今  
皆為乘火車用電信之人無他見微知著惟聖為能下此則非閱歷不能增其智識此足見興遠大之規  
者必不徇蚩氓之欲而辦事必核實用人必擇長皆以公正者取之一世之才自足供一世之用斷不致  
任事無人各國維新之傑其先固不皆出自學堂乃因學堂而愈進也惟是東西各國政制大都本末相  
因首尾相貫倘模稜不決枝節而為則百弊叢生轉得授議者以口實諸國從同一國不能獨異此固堯  
舜禹湯在今必行唐宋元明知此不廢者也今者時局日迫交涉日艱中外企望日切久在 聖鑒之中  
及今改除成格猶可挽救通遼 諭旨披瀝實陳仰祈 聖慈採擇施行則大局幸甚得 旨著政務處  
酌核隨時請旨施行○壬辰夏至大祀 地於 方澤 上親詣行禮○政務處奏本年三月二十一日  
准軍機處鈔交御史黃昌年奏各衙門具奏奉 有准駁之件須令各衙門皆知重要則明發 諭旨次

要則編發閱鈔擬請 飭交政務處妥議辦法凡政務處練兵處學務處及銀行鐵路礦務電綫一切舉  
行要政或揭署前或發閱鈔或通行移會或刊刻告示等語臣等查立政之要必貴宣通讀法之煩尤宜  
詳備近年京外創行新政增益舊章條目繁夥規制日異講求政治自以刊錄摺件為要務是以臣等前  
經奏請採取中外案牘鈔送編輯政要復於議覆前四川學政吳郁生請修政治專書摺內聲明嗣後凡  
有內外各衙門奏定各摺件擬由軍機處鈔送政務處逐件檢閱但非事關慎重即發交報房刊行業經  
奉 旨允准正與該御史所請刊布摺件之意相符旋經酌量變通由各衙門徑咨政務處發鈔惟各衙  
門鈔送多有遲漏以致刊布未能完備應即分別咨催凡嗣後具奏摺件除事關慎重及照例核覆之件  
毋庸鈔送外所有創改章程及議定事件皆於奉 旨後咨送政務處陸續發刊以廣傳布凡軍機處於  
京外摺件向係奉明發 諭旨及有辦法者概交發鈔其無辦法及事宜慎重者則不發鈔應仍由軍機  
處酌核辦理得 旨如所議行○癸巳 慈禧端佑康頤昭豫莊誠壽恭欽獻崇熙皇太后 皇上御皇  
極殿墨書國設理使臣胡爾達親見呈遞恭賀 皇太后萬壽國書○准貴州提督潘萬才終制以劉  
光才為貴州提督○甲午 上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○  
丁酉諭禮部奏請考試出洋畢業學生一摺著於六月初二日在保和殿考試○諭禮部奏萬壽聖節禮

儀一擱著在仁壽殿行禮停止筵宴○孫寶琦奏安南自屬外國後設防造路接壤滇桂實逼處此自日本戰勝俄國法人大恐慮日本襲取安南尤慮中國與日聯合故年來運兵運械不遺餘力近來政府議院知兵力之不足恃咸謂宜聯結中日兩國格外和好不使生聲並優待安南土人方爲可恃故其體我之意似非僞爲安南各埠中國工商人等十餘萬向未派有領事故有種種之苛稅前任使臣薛福成曾與該外部商議免稅而不得臣到任後復與該外部申論許以商之藩部藩部行查中印度總督迄未定議臣探知法政府決無阻撓印督以須另籌一欸相抵故未能遽行定議趁此法人蓄意驅我或可極力辦到臣現派道員嚴璵主事恩慶前往安南游歷往晤中印度總督催詢此事以期必成至於華人僑居者大都椎魯無文商情渙散以致不能與他國商人爭勝臣責令該員等前往各埠激勸衆商設立商會廣建學堂以期商業蒸蒸日上以自立永不受侮查各商大半籍隸閩廣將來必須與閩廣保商局妥商善後之策俟該員等考查完竣前往福建廣東稟商督臣詳籌切實辦法以副 朝廷軫念僑民之至意報聞○伍廷芳等奏光緒三十一年四月初五日准軍機處鈔交御史劉彭年奏禁止刑訊有無窒礙請再加詳慎一摺奉 旨著伍廷芳沈家本妥議具奏欽此查原奏內稱刑訊爲東西各國所竊笑即中國政治法律家久已心知其非而不敢議改者誠以中國人心不古一切治具又復疎簡闊目不能察及

隱微徒慕外國之不用刑訊而不深求其所以不用刑訊官吏不善奉行誠恐有如 上諭所云陽奉陰違者與其嚴防於後不如豫籌於前按外國不用刑訊者以其有裁判訴訟各法也凡犯人未獲之前有警察包探以偵之犯人到案以後有辯護人陪審員以聽之自豫審至公判旁徵於眾證不取供於犯人供證確鑿罪名立定今中國改定刑法方有端倪聽訟之法一切未備有刑而不輕用犯人雖狡尙有畏刑之心若驟然禁止刑訊則無所畏懼孰肯供吐實情問刑衙門窮於究詰必致積壓案件經年不結拖累羈留轉於矜恤庶獄之法有所籌擬 臣愚以爲禁止刑訊須俟裁判訴訟各法俱備後方可實見施行抑 臣更有請者東西各國裁判所原係民事刑事分設民事卽戶婚田產錢債等是也刑事卽人命賊盜闖毆等是也中國民事刑事不分至有錢債細故田產分爭亦復妄加刑嚇問刑之法似應酌核情節以示區別所有戶婚田產錢債等事立時不准刑訊無待游移至於人命盜賊以及情罪較重之案似未便遽免刑訊相應請 旨飭下修律大臣體察時勢再加詳慎並 飭於刑法及刑事訴訟法告成後卽將民法及民事訴訟法剋期纂訂以成完備法律則治外法權可以收回等語奏奉 諭旨著 臣等妥議具奏 臣等查該御史所奏自係爲慎重刑獄恐有窒礙起見惟泰西各國無論各法是否俱備無論刑事民事大小各案均不用刑訊此次修訂法律原爲收回治外法權起見故齊一法制取彼之長補我之短實



爲開辦第一要義惟中外法制之最不相同者莫如刑訊一端是以臣等核議劉坤一等恤刑獄摺內於省刑責一條議如所奏辦理然猶必限以徒流以下罪名不准刑訊而於命盜死罪案件未嘗概行停止者亦因此時小民教養未孚問官程度未逮出此補救目前之策已屬不得已之辦法查定例載明內外問刑衙門審辦案件務得輪服供詞其有刁健堅不承招者如犯該徒罪以上仍具衆證情狀奏請定奪詳繹例意犯供務期輪服既輪服矣則所供非由刑求而得可知徒罪以上仍具衆證有衆證矣則不得以刑逼取犯供更可知臣等前奏不過申明舊例略爲變通其實與西法無涉也原奏又謂驟然禁止刑訊則犯無所畏懼孰肯供吐實情必致積壓拖累等語豈一用刑訊便可免積壓免拖累耶何以從前各省積壓之案有數年及數十年不結者且有拖累無辜梗斃多命者其將何說以處此又如原奏一則曰刑訊爲各國所竊笑再則曰中國政治家久已心知其非夫既爲外人所竊笑矣既心知其非矣卽應奮然禁絕無待躊躇乃又謂應俟裁判訴訟各法俱備後方可實見施行是明知非義而不速改不更爲東西各國所竊笑乎查各國編纂法律大率於新律未頒之前設單行法去其太甚急所當先況值百度維新之際因革損益雖緩須臾故練兵以強國雖目前將弁未儲而不得不先定官制學堂以育才雖現在專門無人而不得不預設大學明刑與練兵興學並重必待各法備後始去刑訊曠日持久收效何時

設將來裁判訴訟諸法同時頒布羣情狃於習慣仍以去刑訊爲不便將武健嚴酷之風終無禁絕之一日於此而欲收回治外法權其可得哉夫今日中國刑訊之弊非一端矣原奏所謂中國民事刑事不分至有錢債細故田產分爭亦復妄加刑嚇洵屬歷來之錮習又其甚者竟至波及案外無辜橫加敲扑小民遇有訟事無計避地方官之拷責冤抑莫伸遂鋌而走險淵魚叢雀驅之者誰興言及此可爲寒心原奏乃謂有刑訊則犯人尙有畏刑之心去刑訊則問官窮於究詰徒責小民之無良而不計問官之殘酷揆諸公理已覺背馳況自來懦弱者往往畏刑自誣兇暴者往往茹刑不吐徒恃刑求必不免有枉濫者至原奏謂中國人心不古一切治具又復疎節闊目不能察及嚙微亦未爲篤論臣廷芳徧歷歐美深知彼中風俗凡有血氣心理皆同中外民情無甚懸絕雖政教稍異而今日各國法制之完備皆由逐漸改革而成並非一蹴所能幾及所以臣等奏請教工藝辦警察興學堂無非欲進之以漸而於核議劉坤一等原摺內復聲明訴訟裁判諸法將來應仿照各國另設專章俟參酌妥當再行奏明辦理並非謂一去刑訊此外遂無餘事也更以臣廷芳身所親歷者證之查香港一島內地商民僑居於此者不下三十萬人昔年臣廷芳在該港任理刑事維時規制未備凡審判事宜係用英法專憑證佐不事刑求隨訊隨結案件從無積壓實無庸懸過慮也況尙德緩刑爲古今中外所共美前者明降諭旨宣示天下各國

公使以及商人咸祝頌我 皇太后 皇上聖恩普被邁越古今其悅服之心溢於言表此舉實為環球  
觀瞻所繫內外問刑衙門務須實力奉行仰體 朝廷矜恤庶獄之意歷久習慣自無所難增 國脈而  
固民心其端皆基於此矣所有該御史奏請人命賊盜及情罪較重之案未便遽免刑訊之處等原奏  
業已分敘明晰應毋庸議至該御史請刑法及刑事訴訟法告成後即將民法及民事訴訟法纂訂以成  
完備法律洵屬有條不紊臣等擬俟刑律告竣後即行分別編輯陸續奏聞再現在改章伊始一切未能  
詳備必得訴訟法相輔而行方能推行無阻擬編輯簡明訴訟章程先行奏明辦理合併聲明下政務處  
刑部知之○戊戌錫良奏川庫歲入欸近千萬取非不多而用益宏平時已費騰挪頃年撥解京外者更  
有加焉況夫新政實煩無一不須籌費司員並形竭蹶州縣尤困催科上下交窮理財乏策近以鑄邊不  
靖泰凝之役廣功迅奏而巴塘兵事方興自打箭爐以外五數不生兵米全由轉運又值雅州屬頻年荒  
歉必赴邛州嘉定分途採買其運較遠其費倍常優價以雇夫驛設站以資遞送到爐之費率兩三石而  
致一石關外千餘里數更過之既非從前提欸未盡之時得在外銷欸內設法彌補倘全數推諸士卒則  
遠征窮漠難苦萬狀餉精本不為豐又何堪此扣減也奴才前飭馬維祺趙爾豐各在川滇添募勇現  
在將次成軍早經督促開行總因轉粟猶難踵接懼軍食之不繼未能輕銳以圖功日內將進款裏塘由

此勒兵深入破負固之勢而服荒險之區雜糧不得不充師旅不得不厚糧敵伐謀不得不審乃期於一舉獲全而將來戡定之餘倘非設戍留防無以備不虞之患故論是役事機縱順疆場縱利皆有不能求刻期凱撤者初次司庫已發銀三十餘萬繼此者時日孔長無計搜羅亟應預爲策畫體驗商民財力業經無可加抽亦復無可再派卽曰誘之以榮顯惟辦賑捐而救饑旱三年於此募集已窮若非獎給實官將致無人應命本有奉天廣西之例但紛紛援請恐於部庫收捐之款究屬相妨然概執十成議敘之條又慮徒成虛語擬卽勸諭川省官紳商民量力捐助鑪邊軍餉請獎正佐各官並分缺先開等項花樣之班分指之類均照例銀八成核算請獎遇缺先花樣照十成核算如獎銜封貢監者方照四成核算所有應准收捐條款悉按廣西等省辦理上年川省鹽捐助餉捐等案皆按例銀三成獎給實官今則倍半之加又與他處有多寡之異明知納粟者不憚趨運而樂就輕特以無礙部捐故請嚴示其區別俟奉准後惟有以生長之鄉宜游之地勸其輸邊之義藉階秩爲鼓舞較勝於僅恃虛榮伏念微外軍需迥殊於內地川中窘況大異於昔年奴才日與藩司計慮再三實出於不得已而爲此請合無仰懇 天恩俯賜敕部迅爲核准覆川俾得及早開辦仍以一年限滿卽行停止下戶部議奏○己亥准大學士崇禮致仕○調鐵良爲戶部右侍郎增崇爲兵部左侍郎○庚子諭大學士王文韶當差多年勤勞卓著現在年逾七

旬每日召對起跪未免艱難自應量予體恤著開去軍機大臣差使以節勞動○命兵部左侍郎徐世昌在軍機大臣上學習行走○調普善爲鑲藍旗滿洲都統以訥勒赫爲鑲黃旗蒙古都統○辛丑命徐世昌充政務處大臣○命鐵良徐世昌會辦練兵事宜○是月俄羅斯國新簡駐華使臣璞科第抵任